



82
16



證治準繩第六冊目錄

大小腑門

泄瀉滯下總論

滯下 卽痢疾

大便不通

小便不通

小便數

小便黃赤

赤白濁



泄瀉

大小便不通

閉癰遺尿總論

淋 胞痺

小便不禁

遺精

前陰諸疾

陰縮 陰縱 陰痿 陰汗 臊臭 陰冷 陰痒 陰吹

陰腫痛

疝

交腸

腸鳴

脫肛

穀道痒痛

痔

證治準繩第六冊

金壇王肯堂輯

泄瀉滯下總論

泄瀉之證水穀或化或不化並無努責惟覺困倦若滯下則不然或膿或血或膿血相雜或腸垢或無糟粕或糟粕相雜雖有痛不痛之異然皆裡急後重逼迫憊人
潔古論曰藏府瀉利其證多種大抵從風濕熱論之是知寒少熱多寒則不能久也故曰暴泄

非陰久泄非陽論云春宜緩形形緩動則肝木
乃榮反靜密則是行秋令金能制木風氣內藏
夏至則火盛而金失獨火木旺而脾土損矣輕
則餐泄身熱脉洪穀不能化重則下利膿血稠
粘裏急後重故曰諸泄稠粘皆屬於火經曰溲
而便膿血知氣行而血止也宜大黃湯下之是
為重劑黃芩芍藥湯是為輕劑是實則泄其子
水能自虛而脾土實矣故經曰春傷於風夏為
餐泄此逆四時之氣人所自為也

此所謂滯下也

有自太陰脾經受濕而為水泄虛滑身重微滿
不知穀味假令春宜益黃散補之夏宜泄之法
云宜補宜泄宜和宜止和則芍藥湯止則訶子
湯久則防變而為膿血是脾經傳受於腎謂之
賊邪故難愈也若先利而後滑謂之微邪故易
安也此皆脾土受濕天之所為也雖聖智不能
逃口食味鼻食氣從鼻而入留積於脾而為水
泄也

此所謂滯下也
所謂泄瀉也
有厥陰經動下利不止其脉
沉而遲手足厥逆膿血稠粘此為難治宜麻黃

湯小續命湯汗之法云謂有表邪縮於內當散
表邪而自愈此一節風泄也有暴下無聲身冷自
汗小便清利大便不禁氣難布息脉微嘔吐急
以重藥温之漿水散是也此一節寒泄也故法曰
後重者宜下腹痛者宜和身重者宜除濕脉弦
者去風膿血稠粘者以重藥竭之身冷自汗者
以毒藥温之風邪內縮者宜汗之則愈鶩溇爲
利宜温之而已又曰在表者發之在裏者下之
在上者湧之在下者竭之身表熱者內疎之小

便澀者分利之又曰盛者和之去者送之過者
止之兵法曰避其來銳擊其惰歸此之謂也
凡病泄而惡寒太陰傳少陰爲土來尅水也用
除濕白朮扶苓安脾芍藥桂枝黃連破血火邪
不能勝水太陰經不能傳少陰而反助火邪上
乘肺經而痢必白膿也加當歸芍藥之類是已
又裏急後重脉大而洪實爲裏實證而痛甚
是有物結墜也宜下之若脉浮大慎不可下
雖裏急後重脉沉細而弱者謂寒邪在內而氣

散也可溫養而自安。○裏急後重閉者大腸氣
不宣通也。宜加檳榔木香宣通其氣。若四肢慵
倦小便少或不利大便走沉困飲食減少宜調
胃去濕。白朮芍藥茯苓三味水煎服。白朮除脾
胃之濕。芍藥除胃之濕熱。四肢困倦茯苓能通
水道走濕。○如發熱惡寒腹不痛加黃芩為主
如未見膿而惡寒乃太陰欲傳少陰也。加黃連
為主。桂枝佐之。如腹痛甚加當歸倍芍藥。如見
血加黃連為主。桂枝當歸佐之。○如煩燥或先

便白膿後血或發熱或惡寒非黃連不能止。上
部血也。如惡寒脈沉先血後便非地榆不能除。
下部血也。如惡寒脈沉或腰痛或臍下痛非黃
芩不能除。中部血也。如便膿血相雜而脈浮大
慎勿以大黃下之。下之必死。謂氣下竭也。而陽
無所收。凡陰陽不和惟以分陰陽之法治之。
又曰暴泄非陰久泄非陽。有熱者脈疾身動聲
亮暴注下迫此陽也。寒者脈沉而細身困鼻息
微者薑附湯主之。身重不舉木附湯主之。渴

引飲者是熱在膈上水多入則自胸膈入胃中
胃本無熱因不勝其水胃受水攻故水穀一時
下此證當灸大椎三五壯立已乃督脉瀉也如
用藥使車前子雷丸白朮茯苓之類五苓散亦
可又有寒泄者大腹滿而泄又有驚瀉者是
寒泄也驚者鴨也大便秘如冰其中有少結糞者
是也如此者當用天麻附子乾薑之類又法
曰泄有虛實寒熱虛則無力不及粘衣未便已
泄出謂不能禁固也實則數至圓而不便俗云

虛坐努責是也裏急後重皆依前法進退大承
氣湯主之太陽病為挾熱痢涼膈散主之
悞下因而下利不止為挾熱利陽明為瘡痂進退大承氣湯
主之太陰濕勝濡瀉不可下而可溫四逆湯
主之少陰蟄風不動禁固可瀉赤石脂丸乾
薑湯主之厥陰風泄以風治宜小續命湯消
風湯主之少陽風氣自動大柴胡湯主之
胃泄飲食不化色黃承氣湯脾泄腹脹滿泄注
食即嘔吐逆建中理中湯大腸泄食已窘迫大便

世為帶下總論 建中理中湯 大腸泄食已窘迫大便

色白腸鳴切痛乾薑附子湯小腸泄澀而便膿血

少腹痛承氣湯大瘕泄裏急後重數至圜而不

能便莖中痛五泄之病胃小腸大瘕三證皆

以清涼飲子主之其泄自止厥陰證加甘草以

緩之少陰證裏急後重加大黃又有太陰陽明

二證當進退大承氣湯主之太陰證不能食是

也當先補而後泄之乃進藥法也先煎厚朴半

兩製水煎二三服後未已謂有宿食未消又加

枳實二錢同煎二三服泄又未已如稍進食尚

有熱毒又加大黃二錢推過泄止住藥如泄未

已為腸胃有久塵垢滑粘加芒硝半合宿垢去

盡則愈也陽明證能食是也當先泄而後補謂

退藥法也先用大承氣湯五錢水煎服如利過

泄未止去芒硝後稍熱退減大黃一半再煎兩

服如熱氣雖已其人必腹滿又減去大黃與枳

實厚朴湯又煎三兩服如腹滿退泄亦自愈後

服厚朴湯數服則已按進退承氣法須審之

脈證的知有積熱及形病俱實而後可下此已

上雖出潔古家珍東垣活法機要而多出於劉
河間保命集之文故其用藥於疎蕩為多觀者
會其意毋泥其辭可矣 東垣云胃氣和平飲
食入胃精氣則輸於脾上歸於肺行於百脉而
養榮衛也若飲食一傷起居不時損其胃氣則
上升精華之氣反下降是為餐泄久則太陰傳
少陰而為腸澼假令傷寒冷飲食臏滿而脹傳
為餐泄者宜溫熱之劑以消導之傷濕熱之物
而成膿血者宜苦寒之劑以內疎之風邪下降

者升舉之濕氣內盛者分利之裏急者下之後
重者調之腹痛者和之洞泄腸鳴無力不及粘
衣其脉細微而弱者溫之收之膿血稠粘數至
圓而不能便其脉洪大而有方者下之寒之大
抵治病當求其所因察何氣之勝取相尅之藥
平之隨其所利而利之以平為期此治之大法
也 瀉利久不止或暴下者皆太陰受病不可
離甘草芍藥若不受濕則不利故須用白朮是
以聖人立法若四時下利於芍藥白朮內春加

泄瀉論 卷之六
防風夏加黃芩秋加厚朴冬加桂附然更詳外
證寒熱處之如裏急後重須加大黃如身困倦
須用白朮若自汗逆冷氣息微加桂附以溫之
如或後重膿血稠粘雖在盛冬於溫藥內亦加
大黃

診 胃脉虛則泄 脉滑按之虛絕者其人必
下利 肺脉小甚為泄小者氣血皆虛 腎脉小甚為
洞泄小者氣血皆少腎主閉藏今 尺寒脉細
謂之後泄 尺膚寒其脉小者泄少氣 下利

脉沉弦者下重 下利寸口反浮數尺中自瀉
者必清膿 溲病若腹大而泄者脉當細微而
瀉反緊大而滑者死 泄而脉大者難治 病
泄脉洪大是逆也 泄注脉緩時小結者生浮
大數者死 下利脉大為不止 下利日十餘
行脉反實者死 大便赤辦餐泄脉小者手足
寒難已餐泄脉小手足溫易已 腹鳴而滿四
肢清泄其脉大是逆也如是者不過十五日死
矣 腹大脹四末清脫形泄甚是逆也如是者

不及一時死矣 下利手足厥冷無脈者灸之
不溫若脈不還反微喘者死 下利後脈絕手
足厥冷晬時脈還手足溫者生脈不還者死
病者痿黃燥而不渴胸中寒而利不止者死
假令下利寸口關上尺中悉不見脈然尺中時
一小見脈再舉頭者腎氣也若見損脈來為難
治 下利如魚腦者半死半生 下利如塵腐
色者死 純血者死 如屋漏汁者死 下利
如竹筒注者不可治 脈細皮寒氣少泄利前

後飲食不入此謂五虛不治若用參朮膏早救
之亦有生者 下則泄瀉上則吐痰皆不巳為
上下俱脫死

世瀉下利論
夫六府氣絕於外者
手足寒上氣脚縮五藏氣絕於內者利不禁甚
者手足不仁下利脉沉弦者下重脉大者為
未止脉微弱數為欲自止雖發熱不死下利
手足厥冷無脉者灸之不温若脉不還反微喘
者死少陰負跌陽者為順也下利有微熱而
渴脉弱者當自愈下利脉數有微熱汗出今
當自愈設脉數為未解下利脉數而渴者當

泄瀉

金匱下利病脉證并治
夫六府氣絕於外者
手足寒上氣脚縮五藏氣絕於內者利不禁甚
者手足不仁下利脉沉弦者下重脉大者為
未止脉微弱數為欲自止雖發熱不死下利
手足厥冷無脉者灸之不温若脉不還反微喘
者死少陰負跌陽者為順也下利有微熱而
渴脉弱者當自愈下利脉數有微熱汗出今
當自愈設脉數為未解下利脉數而渴者當

自愈設必清膿血以有熱也清古圍字 下利脈反
弦發熱身汗者自愈 下利氣者當利小便
下利寸脈反浮數尺中自濇者必清膿血 下
利清穀不可攻其表汗出必脹滿 下利脈沉
而遲其人面少赤身微熱 下利清穀者必鬱
胃汗出而解病人必微厥所以然者其面戴陽
下虛故也 下利後脈絕手足厥冷晷時脈還
手足溫者生脈不還者死 下利腹脹滿身體
疼痛者必溫其裏後攻其表溫裏宜四逆湯攻

表宜桂枝湯 下利三部皆平按之心下堅者
急下之宜大承氣湯 下利脈遲而滑者實也
利未欲止急下之宜大承氣湯 下利脈反滑
者當有所去下乃愈宜大承氣湯 下利已瘥
至半月日時復發者以病不盡故也當下之大
承氣湯以上數承氣湯本虛者當別議 下利譫語者有燥矢
故也小承氣湯主之 下利便膿血者桃花湯
主之 熱利下重者白頭翁湯主之 下利後
更煩按之心下濡者為虛煩也梔子豉湯主之

下利清穀裏寒外熱汗出而厥者通脈四逆湯主之。下利腹痛紫參湯主之。乾嘔下利黃芩湯主之。右此下利一章後世名醫諸書皆以為法古之所謂下利即今之所謂泄瀉也。內有治傷寒數方仲景用治雜病今全錄之使後人知云治傷寒有法治雜病有方者非也傷寒雜病同一法矣。

丹溪云有濕 有氣虛 火 痰 食積 戴

復菴云瀉水腹不痛者濕也飲食入胃輒後之

完穀不化者氣虛也腹痛瀉水腸鳴痛一陣瀉一陣者火也或瀉或不瀉或多或少者痰也腹痛甚而瀉瀉後痛減者食積也 濕多成五泄 戴云餐泄者水穀不化而完出濕兼風也澹泄者漸下汚積粘垢濕兼熱也驚泄者所下澄徹清冷小便清白濕兼寒也濡泄者體重軟弱泄下多水濕自甚也滑泄者久下不能禁固濕勝氣脫也 濕瀉脉濡細乃太陰經脾土受濕瀉水虛滑身重微滿不知穀味口不渴久雨泉

溢河溢或運氣濕土司令之時多有此疾宜除
濕湯吞戊巳丸佐以胃苓湯重者水附湯 東
垣云予病脾胃久衰視聽半失此陰盛乘陽加
之氣短精神不足此由弦脉令虛多言之過也
皆陽氣衰弱不得舒伸伏匿於陰中耳癸卯歲
六七月間淫雨陰寒踰月不止時人多病泄利
一日予體重肢節疼痛大便泄并下者二而小
便閉塞思其治法按內經標本論大小不利無
問標本先利小便又云在下者引而竭之亦是

先利小便也又云諸泄利小便不利先分別之
又云治濕不利小便非其治也皆言當利小便
必用淡味滲泄之劑以利之是其法也噫聖人
之法雖布在方策其不盡者可以意求耳今客
邪寒濕之淫從外而入裏以暴加之若從已上
法度用淡滲之劑以除之病雖即已其降之又
降是復益其陰而重竭其陽則陽氣愈削而精
神愈短矣是陰重強陽重衰反助其邪之謂也
故必用升陽風藥即痿以羌活獨活柴胡升麻

各一錢防風根半錢炙甘草半錢同以咀水二
 鍾煎至一盞去渣稍熱服大法云濕寒之勝助
 風以平之又曰下者舉之得陽氣升騰而去矣
 又法云客者除之是因曲而為之直也夫聖人
 之法可以類推舉一而知百者也若不達升降
 浮沈之理而一槩施治其愈者幸也 濕兼寒
 瀉內經曰濕勝則濡泄甲乙經云寒氣客於下
 焦傳為濡泄夫脾者五藏之至陰其性惡寒濕
 今寒濕之氣內客於脾故不能裨助胃氣腐熟

水穀致清濁不分水入腸間虛莫能制故洞泄
 如水隨氣而下謂之濡泄法當除濕利小便也
 治之以對金飲子 濕兼熱瀉益元散參茸丸
 濕兼風見餐泄條 寒瀉脉沉細或弦遲身
 冷口不渴小便清白或腹中綿綿作疼宜理中
 湯附子温中湯漿水散 暴泄如水周身汗出
 一身盡冷脉沉而弱氣少而不能語甚者加吐
 此謂緊病宜以漿水散治之 若太陽經傷動
 傳大陰下利為驚漉大腸不能禁固卒然而下

中有硬物欲起而又下欲了而又不了小便多清此寒也宜溫之春夏桂枝湯秋冬白朮湯理中湯治泄瀉加橘紅茯苓各一兩名補中湯若溏泄不已者於補中湯內加附子一兩不喜飲食水穀不化者再加砂仁一兩共成八味仲景云下利不止醫以理中與之利益甚理中者理中焦此利在下焦赤石脂禹餘糧湯主之用此加法則能理下焦矣戴云寒瀉寒氣在腹攻刺作痛洞下清水腹內雷鳴米飲不化者

理中湯或附子補中湯吞大已寒丸或附子桂香丸畏食者八味丸元是冷瀉因瀉而煩躁引飲轉飲轉瀉者參附湯連理湯如寒瀉服上藥未効宜木香湯或薑附湯六柱湯吞震靈丹養氣丹手足厥逆者兼進硃砂丹藥食方入口而即下者名曰直腸難治如瀉已愈而精神未復舊者宜十補飲寒瀉腹中大疼服前藥外兼進乳苴丸服諸熱藥以溫中並不見効登園不迭穢物隨出此屬下焦宜桃花丸二五粒訶梨

勒丸以澀之。按戴方多過於克熱用者審之。熱瀉脈數疾或洪大口乾燥身多動音聲響亮暴注下迫益元散加苓連燈心淡竹葉之屬。泄而身熱小便不利口渴者益元五苓若火多四苓加木通黃芩。泄而困倦不便者及脈數虛熱者宜參朮滑石苓通。泄而脈滑堅者實熱宜大承氣湯。戴云熱瀉糞色赤黃彈響作痰糞門焦痛糞出穀道猶如湯熱煩渴小便不利宜五苓散吞香連丸。凡瀉津液既去口

必渴小便多是赤澀未可便作熱論的知熱瀉方用冷劑不然勿妄投以致增劇。玉龍丸治一切伏暑泄瀉神效。理中湯加茯苓黃連名連理湯用之多有奇功且如今當暑月若的知暑瀉自合用暑藥的知冷瀉自合用熱藥中間有一等盛暑又復內傷生冷非連理湯不可下泄無度泄後却彈過響肛門熱小便赤澀心下煩渴且又喜冷此藥為宜若元是暑瀉經久下元虛甚日夜頻併暑毒之勢已然而瀉不已復

用暑藥則決不能取効，便用薑附輩，又似難施。疑似之間，尤宜用此。氣瀉腸鳴，氣走胸膈痞悶，腹急而痛瀉，則腹下稍可須臾，又急亦有腹急氣塞而不通者，此由中脘停滯，氣不流轉，水穀不分所致。戴法用大七香丸入米煎服，久而不愈者，五膈寬中散吞震靈丹，仍佐以米飲調香附末，調氣散。金匱訶梨勒散治氣利，氣虛瀉用四君子湯加麴蘖升柴吞二神加木香丸。積滯泄瀉，腹必耕痛，方泄者是也。或肚

腹滿按之堅者，亦是也。受病淺者，宜神麴之類消導之病，深而頑者，必用進退承氣之類下之方安。傷食瀉因飲食過多，脾胃之氣不足以運化而瀉，其人必噫氣如敗卵臭，宜治中湯加砂仁半錢，麴蘖枳朮丸，或七香丸紅丸子雜服。食積腹疼而瀉，不可遽用治中，兜住宜先用消導推蕩之藥，或因食一物過傷而瀉，後復食之，卽瀉者，以脾爲所傷，未復而然，宜大建脾湯者，可仍燒所傷之物存性爲末，三五錢重調服。

因食冷物停滯傷脾脾氣不暖所食之物不能
消化瀉出而食物如故宜治中湯加乾葛吞酒
煮黃連丸有脾氣久虛不受飲食者食畢即
腸鳴腹急盡下所食之物方快不食則無事俗
名錄食瀉經年累月宜快脾丸因傷於酒每
晨起必瀉者宜理中湯加乾葛吞酒者黃連丸
或葛花解醒湯吞之因傷麪而瀉者養胃湯
加萊菔子炒研一錢痛者更加木香五分瀉甚
者去藿香加炮薑如其數痰瀉二陳湯海石

青黛黃芩神麴薑汁竹瀝爲丸每服三五十丸
少者必用吐法吐之方愈○一男子夜數如廁
或教以生薑一兩碎之半夏湯洗與大棗各三
十枚水一升磁瓶中慢火燒爲熟水時時呷之
數日便已每日五更即泄瀉有酒積有寒積
有食積有腎虛俗呼脾腎泄有人每早須大
瀉一行或腹痛或不腹痛空心服熱藥亦無効
有人教以夜食前又進熱藥一服遂安後如此
常服愈蓋暖藥雖平且服之至夜力已盡無以

敵一夜陰氣之故也。有人每五更將天明時必溇利一次，有人云此名腎泄，服五味子散頓愈。有人久泄早必泄，一二行泄後便輕快，脈滑而少弱，先與厚朴和中丸五十九丸，大下之後，以白朮爲君，枳殼半夏茯苓爲臣，厚朴炙甘草芩連川芎滑石爲佐，吳茱萸十餘粒爲使，生薑煎服十餘貼而愈。戴云有每日五更初洞瀉服止瀉藥並無効，米飲下五味丸，或專以此五味煎飲，雖節省飲食，大段忌口，但得日間上半

夜無事，近五更其瀉復作，此病在腎，分水飲下二神丸及椒朴丸，或平胃散下小茴香丸。二神丸合五味子散名爲四神丸，治瀉尤妙。小便不利而泄，若津液偏滲於大腸，大便瀉而小便少者，用胃苓散分利之，若陰陽已分而小便短少，此脾肺氣虛不能生水也，宜補中益氣湯加麥門五味，陰火上炎而小便赤少，此肺氣受傷不能生水也，用六味地黃丸加麥門五味，腎經陰虛陽無所生而小便短少者，用滋腎丸腎

氣丸腎經陽虛陰無所化而小便短少者用益氣湯六味丸若誤用滲泄分利復傷陽氣陰無所生而小便益不利則腫脹之證作而疾危矣
○凡大便泄服理中湯小便不利大便反泄不知氣化之過本肺不傳化以純熱之藥治之是以轉泄少服則不止多服則愈熱所以不分若以青皮陳皮之類治之則可經云膀胱者州都之官津液藏焉氣化則能出矣○泄而口渴引飲此為津液內亡用錢氏白朮散或補中益氣

湯腎水不足之人患泄或過服分利之劑而渴者加減八味丸失治必變小便不利水腫脹滿等危証矣○水漬入胃名為溢飲滑泄渴能飲水水下復泄泄而大渴此無藥證當灸大顛在
一推下滑瀉東垣云中焦氣弱脾胃受寒冷陷中大便滑泄腹中雷鳴或因誤下未傳寒中復遇時寒四肢厥逆心胃絞痛冷汗不止此腎之脾胃虛也沉香溫胃丸治之薛氏曰前證若脾胃虛寒下陷者用補中益氣湯加木香肉苳蔻補

海海
卷之六
三
骨脂若脾氣虛寒不禁者用六君子湯加炮薑肉桂若命門火衰脾土虛寒者用八味丸若脾腎氣血俱虛者用十全大補湯送四神丸若大便滑利小便閉澀或肢體漸腫喘嗽唾痰為脾胃虧損宜金匱加減腎氣丸 保命集云虛滑久而不止者多傳變為利太陰傳少陰是為鬼邪先以厚朴枳實湯防其傳變按此法實者用

之虛者不若四神丸實腎之為得也○收澀之劑固腸丸訶子散皆治熱滑扶脾丸桃花丸訶子丸赤石脂禹餘糧湯皆治寒滑○瀉已愈至明年此月日時復發者有積故也脾主信故至期復發熱積大承氣湯寒積感應丸虛者以保和丸加三稜蓬朮之屬投之 趙以德云昔聞先生言泄瀉之病其類多端得於六淫五邪飲食所傷之外復有雜合之邪似難執法而治乃見先生治氣暴脫而虛頓瀉不知人口眼俱閉

泄瀉
呼吸微甚殆欲絕者急灸氣海飲人參膏十餘
斤而愈治陰虛而腎不能司禁固之權者峻補
其腎治積痰在肺致其所合大腸之氣不固者
湧出上焦之痰則肺氣下降而大腸之虛自復
矣治憂思太過脾氣結而不能升舉陷入下焦
而成泄瀉者開其鬱結補其脾胃使穀氣升發
也凡此之類不可枚舉因問先生治病何其神
也先生曰無他圓機活法具在內經熟之自得
矣

餐泄 水穀不化而完出是也史記倉公傳迴
風卽此經云清氣在下則生餐泄又曰久風
入中則爲腸風餐泄夫脾胃土也氣沖和以化
爲事今清氣下降而不升則風邪久而于胃是
木賊土也故沖和之氣不能化而令物完出謂
之餐泄或飲食太過腸胃所傷亦致米穀不化
此俗呼水穀利也法當下者舉之而消尅之也
以加減木香散主之東垣云清氣在下者乃
人之脾胃氣衰不能升發陽氣故用升麻柴胡

助甘辛之味以引元氣之升不令下陷爲餐泄也。又云凡泄則水穀不化謂之餐泄。是清氣在下乃胃氣不升上古聖人皆以升浮藥扶持胃氣一服而愈知病在中焦脾胃也。脈訣曰濕多成五泄濕者胃之別名也病本在胃真氣弱真氣者穀氣也不能尅化飲食乃濕盛故也。以此論之正以脾胃之弱故也。初病奪食或絕不食一二日使胃氣日勝泄不作也。今已成太泄矣。經云治濕不利小便非其治也。又云下焦如

瀆又云在下者引而竭之惟此證不宜此論其病得之於胃氣下流清氣不升陽道不行宜升宜舉不宜利小便。靈樞云頭有疾取之足謂陽病在陰也。足有疾取之上謂陰病在陽也。中有疾傍取之。傍者少陽甲膽是也。中者脾胃也。脾胃有疾取之足少陽甲膽者甲風是也。東方春也。胃中穀氣者便是風化也。作一體而認故曰胃中濕勝而成泄瀉。宜助甲膽風勝以克之。又是升陽助清氣上行之法也。又一說中焦元氣

不足溲便為之變腸為之苦鳴亦緣胃氣不升
故令胃氣上行又云風勝濕也大抵此證本胃
氣弱不能化食奪食則一日而可止夫奪食之
理為胃弱不能化食則為泄如食不下何以
作泄更當以藥滋養元氣令和候泄止漸與食
胃勝則安矣若食不化者於升陽風藥內加炒
麴同煎兼食入頓至心頭者胃之上口也必口
沃沫或食入反出皆胃土停寒其右手關脈中
弦按之洪緩是風熱濕相合穀氣不行清氣不

升為弦脈之寒所隔故不下也麴之熱亦能去
之若反胃者更加半夏入於風藥內同煎
奪食少食欲使胃氣強盛也若藥劑大則胃不
勝藥泄亦不止當漸漸與之今病既久已至衰
弱當以常法治之不可多服餌也人之肉如地
之土豈可人而無肉故肉消盡則死矣消瘦之
人有必死者八內經有七外經有一又病肌肉
去盡勿治之天命也如肌肉不至瘦盡當急療
之宜先奪食而益胃氣便與升陽先助真氣次

用風藥勝濕以助升騰之氣病可已矣餘皆勿論此治之上法也治用升陽除濕湯之類是也春傷於風夏生餐泄木在時為春在人為肝在天為風風者無形之清氣也當春之時發為溫令反為寒折是三春之月行三冬之令也以是知水為太過矣水既太過金肅愈嚴是所勝者乘之而妄行也所勝者乘之則木虛明矣故經曰從後來者為虛邪木氣既虛火令不及是所生者受病也故所不勝者侮之是以土來木之分變而為

餐泄也故經曰清氣在下則生餐泄以其濕令當權故餐泄之候發之於夏也若當春之時木不發生溫令未顯止行冬令是謂傷衛以其陽氣不出地之外也當以麻黃湯發之麻黃味苦味之薄者乃陰中之陽也故從水中補木而瀉水發出津液為汗也若春木既生溫令已顯陽氣出於地之上寒再至而復折之當以輕發之謂已得少陽之氣不必用麻黃也春傷於風夏生餐泄所以病發於夏者以木絕於夏而土旺

世寫
三

於長夏濕本有下行之體故餐泄於夏也不病
於春者以其春時風雖有傷木實當權故餐泄
不病於木之時而發於濕之分也經曰至而不
至是為不及所勝妄行所不勝者薄之所生者
受病此之謂也 仲景法下利清穀裏寒外熱
汗出而厥者通脈四逆湯主之 河間法餐泄
風冷入中泄利不止脈虛而細日夜數行口乾
腹痛不已白朮湯主之 東垣云洩利餐泄身
熱脈弦腹痛而渴及頭痛微汗宜防風芍藥湯

東垣所云內動之風也經云春傷於風夏生
餐泄又云久風為餐泄又云虛邪之中人也始
於皮膚留而不去傳舍於絡脈留而不去傳舍
於經留而不去傳舍於輸留而不去傳舍於伏
衝之脈留而不去傳舍於腸胃在腸胃之時賁
響腹脹多寒則腸鳴餐泄食不化則非內動之
風也潔古云大渴引飲多致水穀一時下者宜
灸大椎三五壯或用車前子雷丸白朮茯苓及
五苓散等藥滲之又如久風為餐泄者則不飲

水而穀完出治法當以宣風散導之後服蒼朮
防風湯餐泄以風為根風非汗不出有病此
者腹中雷鳴泄注水穀不分小便瀉滯皆以脾
胃虛寒故取服荳蔻烏梅粟殼乾薑附子曾無
一効中脘臍下炎已數千燥熱轉甚津液涸竭
瘦削無力飲食減少延予視之予以應象論曰
熱氣在下水穀不分化生餐泄寒氣在上則生
臏脹而氣不散何也陰靜而陽動故也診其脉
兩手皆淨大而長身表微熱用桂枝麻黃湯以

薑棗煎大劑連進三服汗出終日至且而愈次
以胃風湯和其藏府調養陰陽食進而愈經
云脾虛則腹滿腸鳴泄食不化又云餐泄取三
陰三陰者太陰也宜補中益氣湯以白芍藥代
當歸主之又云腎藏志志有餘腹脹餐泄瀉
然筋血又云肝足厥陰之脉所生病者胸滿
嘔逆餐泄視盛虛寒熱陷下施法此皆內因
無風者也

淋瀝
生癰
三

○滯下 卽痢疾

古以赤爲熱 白爲冷 至金河間李東垣始
非之 劉謂諸痢皆由乎熱而以赤屬之心火
黃屬之脾土 白屬之肺金 青屬之肝木 黑乃熱之
極而反兼腎水之化 其諸瀉利皆兼於濕 濕主
於痞 以致怫鬱氣不得宣通 濕熱甚於腸胃之
中 因以成腸胃之燥 故裏急後重 小便赤澀 謂
治諸痢 莫若以辛苦寒藥而治 或微加辛熱 佐
之 辛能開鬱 苦能燥濕 寒能勝熱 使氣宣平 而

此處有極淡之文字，似為另一篇論述或校勘，但內容極其模糊，難以辨認。

已行血則便血自愈調氣則後重自除 李從
脾胃病者而論則曰上逆於肺為白下傳於陰
為赤 衛生寶鑑因謂大陰主瀉傳於少陰為
痢由泄亡津液而火就燥腎惡燥居下焦血分
也其受邪者故便膿血然亦赤黃為熱青白為
寒 丹溪謂滯下因火熱下迫而致裏急後重
用劉氏之治濕熱李氏之保脾土更復一一較
量氣血虛實以施治 三家皆發前代之未發
而舉其要也予嘗因是而研究之自其五色分

五藏者言則可見濕熱之中具有五邪之相挾
自其上逆下傳氣血者言則可見五藏六府十
二經脉之氣血諸邪皆得傷之而為痢之赤白
本自其濕熱為病者言則可見由來致成濕熱
之故非一端自其分痢有虛實者言則可見凡
在痢病者中所有之證如煩躁者咽乾舌黑者
噓噫後重者脹滿者脚痛腫弱之類悉
有虛實之殊是故予於痢證直斷之種種為邪
入胃以成濕熱經經受傷其氣傷則病於肺血

傷則傳於心。心肺者，氣血之主也。氣血所行之方，既病安得不歸所主之藏乎？而大小腸者，心肺之合也。出納水穀，糟粕轉輸之官。胃乃大小腸之總司，又是五藏六府十二經脈稟氣之海。苟有內外之邪，凡損傷於經藏者，或移其邪入胃。胃屬土，濕之化。胃受邪，則濕氣不化，佛鬱而成濕熱矣。或心肺移氣血之病，傳之於合。大腸獨受其病，則氣凝注而成白痢。小腸獨受其病，則血凝注而成赤痢。大小腸通受其病，則赤白

相混而下。胃之濕熱淫於大小腸者，亦如之。其色兼黃若色之黑者，有二。如色之焦黑，此極熱兼水化之黑也。如黑之光若漆者，此瘀血也。或曰：治利從腸胃，世人所守之法也。今乃復求其初感之邪，與初受之經，將何為哉？曰：病在腸胃者，是其標也。所感之邪，與初受之經者，是其本也。且內經於治標本，各有所宜。施之先後，況所傳變之法，又與傷寒表裏無異，何可不求之乎？豈止此而已。至若腸胃自感而病，亦當以邪正

分或正氣先虛而受邪或因邪而致虛則以先
者為本後者為標與夫積之新舊亦如之舊積
者停食結痰所化之積也新積者舊積去後而
氣血復鬱所生者也舊積當先下之新積則不
宜下其故何哉蓋腸胃之腐熟水穀轉輸糟粕
者皆榮衛灑陳六府之功今腸胃有邪則榮衛
運行至此其機為之阻不能施化故衛氣鬱而
不舒榮血泣而不行於是飲食結痰停於胃糟
粕留於腸與所鬱氣泣血之積相挾成滯下病

矣如是者必當下之以通壅塞利榮衛之行至
於升降仍不行衛氣復鬱榮血復泣又成新積
故病如初若是者不必求邪以治但理衛氣以
開通腠理和榮血以調順陰陽陰陽調腠理開
則升降之道行其積不治而自消矣然而舊積
亦有不可下者先因榮衛之虛不能轉輸其食
積必當先補榮衛資腸胃之真氣充溢然後下
之庶無失矣予數見俗方惟守十數方治利不
過攻之澀之而已矣安知攻病之藥皆是耗氣

損血之劑用之不已甚至於氣散血亡五藏空
虛精憊神去而死其固澀之又皆足以增其氣
鬱血泣之病轉生腹脹下爲足腫上爲喘呼諸
疾作焉世人之法何足守乎

丹溪云痢初得之必用調胃承氣及大小承氣
有男子五十餘下利晝有積淡紅色夜無積食
自進先喫小胃丹兩服再與四十九次六十九
去積却與斷下 按此惟實者宜之虛者以芍
藥湯益元散保和丸之類盪積 芍藥湯治下

血調氣經曰溲而便膿血知氣行而血止也行
血則便自安調氣則後重自除 益元散治身
發熱下痢赤白小便不利湯胃中積聚 下痢
勢惡煩併窘痛或久不愈諸藥不止須吐下之
以開除濕熱痞悶積滯而使氣液宣行者宜玄
青丸逐之 玄珠利積丸亦可 玄珠云下痢
赤白腹滿脹痛裏急上渴引飲小水赤澹此積
滯也宜泄其熱中用清腸丸導氣丸推其積滯
而利自止矣凡治積聚之證輕則溫而利之清

腸丸是也。重者天真散舟車丸下之。下後勿便
補之。其或力倦自覺氣少惡食此為挾虛證。宜
加白朮當歸身尾甚者加人參。若又十分重者
止用此藥加陳皮補之。虛回而痢自止矣。丹
溪治葉先生患滯下後甚逼迫正合承氣證。但
氣口虛形雖實而面黃積白此必平昔食過飽
而胃受傷。寧忍二三日辛苦遂與參朮陳皮芍
藥等補藥十餘貼。至二日後胃氣稍完與承氣
二貼而安。苟不先補完胃氣之傷而遽行承氣

寧免後患乎。以上湯積戴云痢疾古名滯下。以氣
滯成積積成痢。治法當以順氣為先。須當開胃
故謂無飽死痢疾也。凡痢初發不問赤白裏
急後重頻欲登圜及去而所下無多既起而腹
內復急宜用藿香正氣散加木香半錢。吞感應
丸或蘇合香丸。吞感應丸。以上調氣赤痢血色鮮
紅或如蛇蟲形而間有血鮮者此屬熱痢宜藿
香正氣散加黑荳三十粒五苓散加木香半錢
粟米少許下黃連丸或黃連阿膠丸茶梅丸熱

甚服上項藥未效宜白頭翁湯 赤痢發熱者
敗毒散加陳倉米一撮煎 若血色黯如瘀服
涼藥而所下愈多去愈頻者當作冷痢宜理中
湯或四君子湯加肉果一錢木香半錢 加減
平胃散青六九治血痢佳 諸血痢不止宜多
用地榆 易簡方云血痢當服胃風湯膠艾湯
之類 心經伏熱下純血鮮色必用犀角生磨汁
半鍾朱砂飛研二錢牛黃三分人參末三錢和
丸如麻子大燈心龍眼肉煎湯下六七分 脾

經受濕下血痢用蒼朮地榆湯 血痢久不止
腹中不痛不裏急後重槐花丸 乾薑於火上
燒黑不令成灰磁碗合放冷為末每服一錢米
飲調下治血痢神效仲景云小腸有寒者其人
下重便血可以此治之赤痢以上 東垣云大便後
有白膿或只便白膿因勞倦氣虛傷大腸也以
黃芪人參補之如裏急頻見汚衣者血虛也宜
加當歸 如便白膿少有滑頻見汚衣者氣脫
加附子皮甚則加御米殼如氣瀉者只以甘藥

氣脫
血虛

補氣當安卧不言以養其氣 戴云白痢下如
 凍膠或如鼻涕此屬冷痢先宜多飲除濕湯加
 木香一錢吞感應丸繼進理中湯亦有下如鮫
 色或如臘茶色者亦宜用前白痢藥 白蠟治
 後重白膿白痢以上 ○若感暑氣而成痢疾者其人
 自汗發熱面垢嘔逆渴欲引飲腹內攻刺小便
 不通痢血頻併宜香薷飲加黃連一錢佐以五
 苓散益元散白湯調服不愈則用蜜水調 感
 暑成痢疾甚食不進六和湯藿香正氣散各半

患痢呃逆

貼名木香交加散以上暑痢 ○老人深秋患痢發呃
 逆嘔者黃蘗炒燥研末陳米飯為丸小碗豈大
 每服三十九人參白木茯苓三味濃煎湯下連
 服三劑即愈切不可下丁香等熱藥 治冷利
 腹中不能食肉豈蔻去皮醋麩裹煨熟搗末粥
 飲下二錢匕 世俗治夏中暑痢疾用黃連香
 薷飲加甘草芍藥生薑神効者蓋夏月之痢多
 屬於暑潔古治處暑後秋冬間下痢用厚朴丸
 大効者蓋秋之痢多屬於寒積經所謂必先歲

氣無伐天和者也以上秋痢 ○金匱下痢腹痛紫參湯主之潔古云厚朴丸治處暑後秋冬間腹痛下痢大効 丹溪曰初下痢腹痛不可用參木然氣虛胃虛者可用初得之亦可用大承氣調胃承氣下之看其氣病血病然後加減用藥腹痛者肺經之氣鬱在大腸之間者以苦梗發之然後用治痢藥氣用氣藥血用血藥其或痢後糟粕未實或食粥稍多或饑甚方食肚中作疼切不可驚恐當以白朮陳皮各半煎湯和

陰陽反錯

之自安 粥多及食肉作痛者宜奪食奪食者減其粥食絕其肉味也 因傷冷水瀉變作赤白痢腹痛減食熱燥四肢困倦無力宜茯苓湯下痢之後小便利而腹中滿痛不可忍此名陰陽反錯不和之甚也越桃散主之 治痢止痛如神方棟淨川連片一兩淨枳殼片一兩槐花三二兩用水浸片時漉淨同川連先炒老黃色次入枳殼再炒待燥棟出槐花不用止將黃連五錢枳殼五錢作一服水煎七分去渣調乳

帶下

桂枝湯

大瘕泄

香沒藥淨末各七分五釐服之次照前方再服
一劑腹痛即止痢即稀神效此方有服之如醉
者乃藥力行也不妨仲景建中湯治痢不分
赤白久新但腹中大痛者神效其脉弦急或瀉
浮大按之空虛或舉按皆無力者是也下利
膿血稠粘腹痛後重身熱久不愈脉洪疾者芍
藥黃芩湯膿血痢無度小便不通腹中痛當
歸導氣湯以上腹痛下利赤白裏急後重香連丸
亦可用連二錢薑半錢為末和勻温酒下仲

景云熱利下重者白頭翁湯主之下利膿血
裏急後重日夜無度宜導氣湯大瘕泄者裏
急後重數至圜而不能便莖中痛用清涼飲子
主之其泄自止莖中痛者屬厥陰加甘草稍裏
急後重多者屬少陰加大黃令急推去舊物則
輕矣內經曰因其重而減之又云在下者引而
竭之裏急後重數至圜而不能便皆宜進退
大承氣湯主之下利赤白後重遲瀉宜感應
丸或曰治後重疎通之劑羅謙甫水煮木香

膏東垣白朮安胃散等方已盡矣又有用御米殼等固澀之劑亦愈者何也曰後重本因邪壓大腸墜下故大腸不能升上而重是以用大黃檳榔輩瀉其所壓之邪今邪已瀉其重仍在者知大腸虛滑不能自收而重是以用御米殼等滑劑固其滑收其氣用亦愈也然大腸為邪墜下之重其重至圍後不減大腸虛滑不收之重其重至圍後隨減以此辨之百不失一也 其或下墜異常積中有紫黑色而又痛甚此為死

扶熱
扶寒

血證法當用桃仁泥滑石粉行之或口渴及大便口燥辣是名扶熱即加黃芩或口不渴身不熱喜熱手熨盪是名扶寒即加乾薑 後重積與氣墜下服升消藥不愈者用秦艽皂角子煨大黃當歸桃仁枳殼黃連等劑若大腸風盛可作丸服 其或下墜在血活之後此為氣滯證宜前藥加檳榔一枚 後重當和氣積與氣墜下者當兼升兼消升謂升麻之類消謂木香檳榔之類 金匱方泄利下重者以水五升煮薤

卷六

白三升至一升去渣以四逆散方寸七分湯中
煮取一升半分溫再服 凡用諸承氣等藥
積之後仍後重者乃陽不升也藥中當加升麻
升其陽其重自去也 東垣云裏急後重數至
圓而不能便或少有白膿或少血者慎勿利之
宜升陽除濕防風湯以上裏急後重 其或氣行血和
積少但虛坐努責此為亡血證倍用當歸身尾
却以生地黄生芍藥生桃仁佐之復以陳皮和
之血生自安 虛坐而不得大便皆因血虛也

血虛則裏急加當歸身 凡後重逼迫而得大
便者為有物而然今虛坐努責而不得大便知
其血虛也故用當歸為君生血藥佐之以上虛
內經膿血稠粘皆屬相火夫太陰主瀉少陰
主痢是先泄亡津液而火就燥腎惡燥居下焦
血分其受邪者故便膿血然赤黃為熱青白為
寒治須兩審治熱以堅中丸荳蔻丸香連丸治
寒白膠香散或多熱少寒水煮木香膏虛滑頻
數宜止宜瀉宜養藏湯 溲而便膿血者小腸

小腸泄

泄也脉得五至已上洪大者宜七宣丸脉平和者立秋至春分宜香連丸春分至立秋宜芍藥藥皮丸四時皆宜加減平胃散如有七宣丸證者亦宜服此藥去其餘邪兼平胃氣以上曠血稠粘其或纏滯退減十之七八穢積未盡糟粕未實當以炒芍藥炒白朮炙甘草陳皮茯苓煎湯下固腸丸三十粒然固腸丸性燥恐尚有滯氣未盡行者但當單飲此湯固腸丸未宜遽用蓋固腸丸者雖有去濕實腸之功其或久痢體虛氣

弱滑泄不止又當以訶子肉荳蔻白礬半夏等藥澀之甚者添牡蠣可擇用之然須以陳皮為佐恐太瀉亦能作痰又甚者灸天樞氣海此二穴大能止泄仲景云下利便膿血者桃花湯主之丹溪云桃花湯主病屬下焦血虛且寒非乾薑之溫石脂之澀且黃不能止血用粳米之甘引入腸胃水煮木香膏易簡斷下湯白朮安胃散養藏湯五倍子為丸赤痢甘草湯下白痢乾薑湯下各十九烏梅二箇煎

湯 石榴一箇燒灰用酸石榴一箇煎湯調二十錢以上東垣治一老僕脫肛日久近復下利裏急後重白多赤少不任其苦此非肉食膏粱者也必多蔬食或飲食不節天氣已寒衣蓋又薄寒侵形體不禁而腸頭脫下者寒也滑也真氣不禁形質不收乃血脫也此乃寒滑氣泄不固故形質下脫也當以澀去其脫而除其滑以大熱之劑除寒補陽以補氣之藥升陽益氣以微酸之味固氣止收名之曰訶子皮散一服減

半再服全愈 養藏湯 地榆芍藥湯 戴云

脫肛一證最難為藥熱則肛門閉寒則肛門脫內用磁石研末每一錢食前米飲調下外用鐵鏽磨湯溫洗以上滯下大便不禁其大孔開如空洞不閉者用葱和花椒末搗爛塞穀道中併服酸澀固腸之劑收之如御米殼訶子皮之類是也神效大孔開痢久大孔痛亦有寒熱者熟艾黃蠟訶子燒熏之因熱而痛檳榔木香黃連黃芩加乾薑因寒而痛炒鹽熨之灸枳

噤口利

實熨之丹溪用瓦片敲圓如銅錢狀燒紅投童子小便中急取起令乾紙裹安痛處因時寒恐外寒乘虛而入也以人參當歸陳皮作濃湯飲之食淡味自安痛大孔痢疾不納食或湯藥入口隨即吐出者俗名噤口有因邪留胃氣伏而不宣脾氣澀而不布故嘔逆而食不得入者有陽氣不足胃中宿食因之未消則噫而食卒不下者有肝乘脾胃發嘔飲食不入縱入亦反出者有水飲所停氣急而嘔穀不得入者有火氣

炎熾內格嘔逆而食不得入者有胃氣虛冷食入反出者有胃中邪熱不欲食者有脾胃虛弱不欲食者有穢積在下惡氣熏蒸而嘔逆食不得入者當各從其所因以為治以脈證辨之如脾胃不弱問而知其頭疼心煩手足溫熱未嘗多服涼藥者此乃毒氣上衝心肺所以嘔而不食宜用敗毒散每服四錢陳倉米一百粒薑三片棗一枚水一盞半煎八分溫服若其脈微弱或心腹膨脹手足厥冷初病則不嘔因服鴛

粟殼烏梅苦澀涼藥太過以致聞食先嘔者此
乃脾胃虛弱用山藥一味剉如小荳大一半入
銀瓦銚內炒熟一半生用同為末飯飲調下
又方用石蓮槌去殼留心併肉碾為末每服二
錢陳米飲調下此疾蓋是毒氣上衝心肺借此
以通心氣便覺思食効 丹溪用人參黃連薑
炒濃煎汁終日細細呷之如吐再喫但一呷下
咽便開痢亦自止神効 楊仁齋用參苓白朮
散加石菖蒲末以道地粳米飲乘熱調下或用

人參茯苓石蓮子肉入些首蒲與之 戴復菴
用治中湯加木香半錢或縮砂一錢以上藥
其或在下則纏滯在上則嘔食此為毒積未化
胃氣未平證當認其寒則溫之熱則清之虛則
用參朮補之毒解積下食自進矣 泄痢久不
安膿血稠粘裏急後重日夜無度宜大黃湯用
大黃一兩剉用好酒兩大盞浸半日同煮至一
盞半去渣分為二次頓服之痢止停服未止再
服以利為度又服芍藥湯以和之所以徹其毒

也 服前藥痢已除宜以白朮黃芩湯和之
丹溪治一人患痢百餘日百法不効六脉促急
沉弦細弱扪左手爲甚晝夜十行視之穢物甚
少雖下清涕中有紫黑血絲食全不進此非痢
也宜作瘀血治之以桃仁乳香沒藥滑石佐以
檳榔木香神麴糊爲丸米飲下百餘粒至夜半
不動又依前法下二百粒至天明下穢如爛魚
腸者二升半困頓終日漸與粥食而安 按此
方恐當有大黃無則難下 又治族叔年七十

稟壯形瘦夏末患泄痢至秋百方不應視之病
雖久而神不瘳小便澀少而不赤兩手脉俱瀼
而頗弦自言胸微悶食亦減因悟此必多年沉
積癖在腸胃詢其平生喜食何物曰喜食鱸魚
三年無日不用此積痰在肺肺爲大腸之藏宜
大腸之不固也當與澄其源而流自清以茱萸
陳皮青葱鹿首根生薑煎濃湯和以砂糖飲一
碗許自以指探喉中至半時吐痰半升如膠其
夜減半次早又服又吐半升而痢自止又與平

帶下

卷之六

四十一

休息痢

勞利

胃散加白朮黃連旬日而安 收澀用木香散
訶黎勒丸久痢 休息痢多因堯住太早積不盡
除或因痢愈而不善調理以致時止時作宜四
君子湯加陳皮一錢木香半錢吞駐車丸只綠
堯住積滯遂成休息再投去積却用堯劑 張
文仲用虎骨灸焦搗末調服日三匙効 久痢
休息痢虛滑甚者用椿根白皮東南行者長流
水內漂三日去黃皮切片每一兩配人參一兩
入煨木香二錢粳米一撮煎湯飲之休息痢 勞

刮利
利後凡

痢因痢久不愈耗損精血致腸胃空虛變生他
證或五心發熱如勞之狀宜藟蓮飲赤多倍蓮
肉白多倍山藥痢後調補宜四君子湯加陳皮
一錢半即異攻散或七珍散惡甜者生料平胃
散加人參茯苓各半錢 諸病壞證久下膿血
或如死猪肝色或五色雜下頻出無禁有類滯
下俗名刮腸此乃藏府俱虛脾氣欲絕故腸胃
下脫若投痢藥則誤矣六柱飲去附子加益智
仁白芍藥或可冀其萬一 痢後風因痢後下

虛不善調將或多行或房勞或感外邪致兩脚
痿軟若痛若痺遂成風痲獨活寄生湯吞虎骨
四斤丸或用大防風湯或多以骨碎補三分之
一同研取汁酒解服外以杜牛膝杉木節白芷
南星草薺煎湯熏洗丹溪云痲後風係血入
藏府下未盡復還經絡不得行故也松明節一
兩以乳香二錢炒焦存性蒼朮黃蘗各一兩紫
葳一兩半甘草半兩桃仁去皮不去尖一兩俱
爲末每服三錢生薑同杵細水盪起二三沸服

隣人鮑子年二十餘因患血痲用澀藥取効
後患痛風號叫撼隣里予視之曰此惡血入經
絡證血受濕熱久爲凝濁所下未盡留滯隧道
所以作痛經久不治恐成枯細遂與四物湯桃
仁紅花牛膝黃芩陳皮甘草煎生薑汁研潛行
散入少酒飲之數十貼又與刺委中出黑血近
三合而安寶鑑云且如瀉痢止脾胃虛難任
飲食不可一槩用剋伐之劑若補養其脾胃氣
足自然能飲食宜錢氏方中異攻散設或喜嗜

世下
世下
世下

飲食太過有傷脾胃而心腹痞滿嘔逆惡心則
不拘此例當權用橘皮枳實丸一服得快勿再
服若飲食調節無傷則胃氣和平矣

大小便不通

脉盛皮熱腹脹前後不通脊悶此謂五實脾
胃氣滯不能轉輸加以痰飲食積阻礙清道太
小便秘澀不快升柴二朮二陳湯數服能令太
便潤而小便長濕熱痰火結滯脉洪盛大小
便秘赤肢節煩疼涼膈散通聖散金匱厚朴太
黃湯選用丹溪治一婦人脾疼後患大小便
不通此是痰隔中焦氣聚上焦二陳加木通初
服後吐查再服燒皂角灰為末粥清調下

推車客七箇土狗七箇二物新瓦上焙乾爲末
以虎目樹皮杖即虎杖向東南者煎濃湯服之連
根葱一二莖帶土生薑一塊淡荳豉二十粒
鹽二匙同研爛作餅烘熱揜臍中以帛紮定良
久氣透自通不通再換一餅陰證大小便不
通及諸雜病陰候大小便不通危急者用牡蠣
陳粉乾薑炮各一兩右爲細末男病用女人唾
調手內擦熱緊揜二卵上得汗出愈女病用男
子唾調手內擦熱緊揜二乳上得汗出愈蓋卵

與乳乃男女之根蒂坎離之分屬也非急不用

大便不通

潔古云藏府之秘不可一集治療有虛秘 有
 實秘 胃實而秘者能飲食小便赤當以麻仁
 丸七宣丸之類主之 胃虛而秘者不能飲食
 小便清利厚朴湯主之 胃氣實者秘物也
 胃氣虛者秘氣也 有風秘 有冷秘 有氣
 秘 有熱秘 有老人津液乾燥及婦人分產
 亡血及發汗利小便病後血氣未復皆能作秘
 不可一例用硝黃利藥巴豆牽牛尤在所禁

風秘者由風搏肺藏傳於大腸故傳化難或其
人素有風病者亦多有秘宜小續命湯去附子
倍芍藥入竹瀝一杯吞潤腸丸或活血潤腸丸
冷秘由冷氣橫於腸胃凝陰固結津液不通
胃氣閉塞其人腸內氣攻喜熱惡冷宜藿香正
氣散加官桂枳殼各半錢吞半硫丸熱藥多秘
惟硫黃暖而通冷藥多泄惟黃連肥腸而止泄
氣秘由氣不升降穀氣不行其人多噫宜蘇
子降氣湯加枳殼吞養正丹或半硫丸來復丹

夫効佐以米香檳榔丸有氣作痛大便秘塞
用通劑而便愈不通又有氣秘強通之雖通復
秘或迫之使通因而下血者此當順氣氣順則
便自通又當求溫暖之劑熱秘面赤身熱腸
胃脹悶時欲得冷或口舌生瘡此由大腸熱結
宜四順清涼飲吞潤腸丸或米香檳榔丸實者
承氣湯仲景云脈有陽結陰結者何以別之
曰其脈浮而數能食不大便者此為實名曰陽
結也期十七日當劇其脈沉而遲不能食身體

重，大便反鞭，名曰陰結也。期十四日，當劇。東垣云：陽結者散之，陰結者熱之。前所云實秘熱秘，即陽結也。前所云虛秘冷秘，即陰結也。老人虛秘及出汗，利小便過多，一切病後血氣未復而秘者，宜蘇子降氣湯倍加當歸，吞葶靈仙丸，或肉黃飲，菴蓉潤腸丸尤宜。東垣云：津液耗而燥者，以辛潤之。腎主五液，津液盛則大便如常，若饑飽勞役損傷胃氣，及食辛熱厚味之物而助火邪，伏於血中，耗散真陰，津液虧少，故

大便結燥。又有年老氣虛，津液不足而結者，腎惡燥，急食辛以潤之，是也。血虛津液枯竭而秘結者，脉必小澀，面無精光，大便雖軟，努責不出，大劑四物湯加陳皮、甘草、酒紅、花、導滯、通幽湯、益血丹。血少兼有熱者，脉洪數，口乾，小便赤少，大便秘硬，潤燥湯活血潤燥丸，四物湯加酒、芍、梔、子、桃、仁、紅、花。大法云：大便秘服神芎丸，大便不通，小便反利，不知燥濕之過，本大腸少津液，以寒燥之藥治之，是以轉燥，少服則不

濟多服則亡血所以不通若用四物麻子杏仁
之類則可經云燥則為枯濕劑所以潤之金
匱真言論云北方黑色入通於腎開竅於二陰
故腎陰虛則小大便難宜以地黄從蓉車前茯
苓之屬補真陰利水道少佐辛藥開腠理致津
液而潤其燥施之於老人尤宜若大小便燥結
之甚求通不得登廁用力太過便仍不通而氣
被掙脫下注肛門有時泄出清水而裏急後重
不可忍者胸膈間梗梗作惡乾嘔有聲渴而索

水飲食不進呻吟不絕欲利之則氣已下脫命
在須臾再下即絕欲固之則溺與燥失膨滿腹
腸間恐反增劇欲升之使氣自舉而穢物不為
氣所結自然通利則嘔惡不堪宜如何處家姑
年八十餘嘗得此患予惟用調氣利小便之藥
雖小獲効不收全功嘗慰之令勿急性後因不
能食遽索末藥利下數行不以告予自謂稍快
矣而脉忽數動一止氣息奄奄頽然牀褥予知
真氣已泄若不收攝恐遂無救急以生脉藥投

之數劑後結脉始退因合益血潤腸丸與服勸
以勿求速効勿服他藥久之自有奇功如言調
理兩月餘而二便通調四肢康勝矣便秘自是
老人常事俗以為後門固壽考之徵而一時難
堪輒躁擾而致疾予所處方不犯大黃可以久
服故表而出之 元戎五燥大便秘 東方其
脉弦風燥也宜瀉風之藥治之獨活羌活防風
茺蔚地黃柴胡川芎 南方其脉洪熱燥也宜
鹹苦之藥治之黃芩黃連大黃黃蘗芒硝 西

南方其脉緩土燥也宜潤濕之藥治之芍藥半
夏生薑烏梅木瓜 西方其脉澀血燥也宜滋
血之藥治之杏仁麻仁桃仁當歸氣結用木香
檳榔枳實陳皮地黃郁李仁 北方其脉遲寒
燥也宜溫熱之藥治之當歸肉桂附子烏頭硫
黃良薑巴苳 潤腸丸加減法 如病人不小
便因大便不通而澀其邪盛者急加酒洗大黃
以利之 如血燥者加桃仁酒洗大黃 如風
結燥者加麻仁大黃 如風澀者加煨皂角仁

大黃秦朮以利之。如脉瀯覺身癢氣瀯者加郁李仁大黃以除氣燥。如寒陰之病爲寒結閉者以局方中半硫丸或加煎附子生薑湯水冷與之其病雖陰寒之證當服陽藥補之若大便恒不甚通者亦當十服中與一服利藥微通其大便不令秘結乃治之大法也。若病人雖是陰證或是陰寒之證其病顯躁脉堅實亦宜陽藥中少加苦寒之劑以去熱躁躁止勿加如陰躁欲坐井中者其二腎脉按之必虛或沉細

而遲此爲易辨如有客邪之病亦從權加之。有物有積而結者當下之。食傷太陰腸滿食不化腹響響然不能大便者以苦泄之。七宣丸木香檳榔丸。桃杏仁俱治大便秘當以血氣分之。年老虛人大便秘者脉浮在氣杏仁陳皮主之。脉沉在血桃仁陳皮主之。所以俱用陳皮者以手陽明病與手太陰爲表裏也。又云盛則難便行陽氣也。敗則便難行陰血也。注夏大便瀯滯者血少血中伏火也。黃芪人參湯加

大便不通
生地黄當歸身桃仁泥麻仁泥潤之。如潤之
大便久不快利者少加煨大黃微利之。如加
大黃久不快利者非血結便秘是熱則生風病
必濕風證止當服黃芪人參湯只用羌活防風
各半兩水四盞煎至一盞去渣空心服之其大
便必大走也。大便不通五日一徧小便黃赤
渾身腫面上及腹尤甚色黃麻木身重如山沉
困無力四肢痿軟不能舉動喘促唾清水吐穢
痰白沫如膠時躁熱發欲去衣須臾而過振寒

項額有時如水額寒尤甚頭旋眼黑目中溜火
冷淚鼻不聞香臭小腹急痛當臍有動氣按之
堅硬而痛宜麻黃白朮湯此病宿有風濕熱伏
於榮血之中其水火乘於陽道而上盛元氣短
少上喘為陰火傷其氣四肢痿在腎水之間乃
所勝之病今正遇冬寒得時乘其肝木又實其
母肺金尅木火是火勝必有火復其證善怒
欠多嚏鼻中如有物不聞香臭目視眈眈多悲
健忘少腹急痛徧身黃腹大脹面自腫尤甚食

大便不通
不下，痰唾涕有血，目眚瘍，大便不通，只二服皆愈。凡諸秘服藥不通，或虛人畏服利藥者，用蜜煎導，或用鹽及皂角末和入蜜煎中，尤捷。蓋鹽能軟堅潤燥，皂角能通氣疎風，故也。冷秘用醬生薑導，或於蜜煎中加草烏頭末以化寒消結，熱者猪膽汁導，烏梅湯浸去核為丸，如棗子大亦可導。醬瓜削如棗亦可導。丹溪云：予觀古方通大便，皆用降氣品劑，蓋肺氣不降則大便難傳送，用枳殼沉香訶子杏

仁等是也。又老人虛人風人津液少而秘者，宜以藥而滑之，用胡麻麻仁阿膠等是也。如妄以峻利藥逐之，則津液走，氣血耗，雖暫通而即秘矣。必更生他病。昔王少府患此疾，有人以駛藥利之者，屢矣。後為肺痿，咯膿血，卒至不通而死。

閉癰遺尿

遺尿者溺出不自知也閉癰者溺閉不通而淋瀝滴點也唯肝與督脉三焦膀胱主之合肝脉督脉主之者經云肝足厥陰之脉過陰器所生病者遺溺閉癰又云督脉者女子入繫廷孔其孔溺孔之端也其男子循莖下至篡與女子等其生病癰痔遺溺故遺溺閉癰皆取厥陰俞穴及督脉俞穴也三焦主之者經云三焦下脉在於足太陽之前少陽之後出於膈中外廉名

此處有非常淡化的文字，內容難以辨認，可能為另一條醫論或校勘記。

曰委陽足太陽絡也三焦者足太陽少陽之所
 將大陽之別也上踝五寸別入貫膈腸出於委
 陽並太陽之正入絡膀胱約下焦實則閉癯虛
 則遺溺遺溺則補之閉癯則瀉之是也膀胱
 主之者經云膀胱不利為癯不約為遺溺是也
 然遺溺閉癯不取膀胱俞穴者蓋膀胱但藏溺
 其出溺皆從三焦及肝督脉也閉癯合而言
 之一病也分而言之有暴久之殊蓋閉者暴病
 為溺閉點滴不出俗名小便不通是也癯者久

病為溺癯淋瀝點滴而出一日數十次或百次
 名淋病是也今分其病立為二門一

心者其出今其流立為二內一...
病為...
...

小便不通

舟溪大法小便不通有熱有濕有氣結於下宜
清宜燥宜升有隔二隔三之治如因肺燥不能
生水則清金此隔一如不因肺燥但膀胱有熱
則宜瀉膀胱此正治也如因脾濕不運而精不
升故肺不能生水則當燥脾健胃此隔二車前
子茯苓清肺也黃蘗知母瀉膀胱也蒼朮白朮
健胃燥脾也 實鑑小便不利有三不可一禁
而論若津液偏滲於腸胃大便泄瀉而小便澀

少一也宜分利而已若熱搏下焦津液則熱濕而不行一也必滲泄則愈若脾胃氣澀不能通調水道下輸膀胱而化者二也可順氣令施化而出也東垣大法小便不通皆邪熱為病分在氣在血而治之以渴與不渴而辨之如渴而不利者熱在上焦肺分故也夫小便者是足太陽膀胱經所主也肺合生水若肺熱不能生水是絕其水之源經云虛則補其母宜清肺而滋其化源故當從肺之分助其秋令水自生焉又

如雨如霧如霜皆從天而降下也且藥有氣之薄者乃陽中之陰是感秋清肅殺之氣而生可以補肺之不足淡味滲泄之藥是也茯苓澤瀉琥珀燈心通草車前子木通瞿麥扁蓄之類以清肺之氣泄其火滋水之上源也如不渴而小便不通者熱在下焦血分故不渴而小便不通也熱閉於下焦者腎也膀胱也乃陰中之陰陰受熱邪閉塞其流易上老云寒在胸中遏塞不入熱在下焦填塞不便須用感北方寒水之化

氣味俱陰之藥以除其熱泄其閉塞內經云無陽則陰無以生無陰則陽無以化若服淡滲之藥其性乃陽中之陰非純陰之劑陽無以化何以補重陰之不足也須用感地之水運而生大苦之味感天之寒氣而生大寒之藥此氣味俱陰乃陰中之陰也大寒之氣人感之生膀胱寒水之運人感之生腎此藥能補腎與膀胱受陽中之陽熱火之邪而閉其下焦使小便不通也夫用大苦寒之藥治法當寒因熱用又云必伏

其所生而先其所因其始則氣同其終則氣異也如熱在上焦以梔子黃芩熱在中焦以黃連芍藥熱在下焦以黃蘗熱在氣分渴而小便閉清肺散猪苓湯五苓散茯苓琥珀湯紅秫散熱在血分不渴而小便閉滋腎丸黃連丸導氣除燥湯東垣治一人病小便不利目睛突出腹脹如鼓膝已上堅硬皮膚欲裂飲食不下服甘淡滲泄之藥皆不効曰疾急矣非精思不能處思之半夜曰吾得之矣經云膀胱者津液

之府必氣化而能出焉多服淡滲之藥而病益甚是氣不化也啓玄子云無陽則陰無以生無陰則陽無以化甘淡氣薄皆陽藥獨陽無陰欲化得乎遂以滋腎丸群陰之劑投服再服即愈渴而腹冷水氣也金匱云小便不利者有水氣其人苦渴括萹瞿麥丸主之以小便利腹中溫爲度五小使不通腹下痛狀如覆椀痛悶難忍者乃腸胃乾涸臏中氣不下經云膀胱者州都之官津液藏焉氣化則能出矣臏中者臣使

之官三焦相火腎爲氣海也王註曰膀胱津液之府胞內居之少腹處間毛內藏胞器若得氣海之氣施化則溲便注下氣海之氣不及則隱秘不通故不得便利也先用木香沉香各二錢酒調下或八正散甚則宜上湧之令氣通達便自通利經所謂病在下上取之王註曰熱攻於上不利於下氣盛於上則溫辛散之苦以利之方煎橘紅茯苓湯調木香沉香末服之空心下丹溪云小便不通屬氣虛血虛有實熱痰

氣閉塞皆宜吐之以提其氣氣升則水自降蓋
 氣承載其水者也氣虛用參朮升麻等先服後
 吐或就參芪藥中調理吐之血虛用四物湯先
 服後吐或就芎歸湯探吐之痰多二陳湯先服
 後探吐之痰氣閉塞二陳加香附木通探吐之
 實熱當利之或用八正散蓋大便動則小便自
 通矣 或問以吐法通小便方論中未嘗有之
 理將安在曰取其氣化而已何則內經謂三焦
 者決瀆之官水道出焉膀胱者州都之官津液

藏焉氣化則能出矣故上中下三焦之氣有一
 不化則不得如決瀆之水而出矣豈獨下焦膀
 胱氣塞而已哉上焦肺者主行榮衛通調水道
 下輸膀胱而腎之合足三焦下輸又上連肺此
 豈非小便從上焦之氣化者乎張仲景有言衛
 氣行則小便宣通其義亦在是矣內經又謂脾
 病則九竅不通小便不利是其一也此豈非小
 便從中焦之氣化者乎由是而言之三焦所傷
 之邪不一氣之變化無窮故當隨處治邪行水

求其氣化亦無窮也然而大要在乎陰與陽無相偏負然後氣得以化若方盛衰論曰至陰虛天氣絕至陽盛地氣不足夫腎肝在下地道也心肺在上天道也脾胃居中氣交之分也故天之陽絕而不交於地者尚且白露不下況人同乎天其在土之陽不交於陰則在下之陰無以爲化而水道其能出乎東垣引八十一難經謂有陰陽相乘有覆有溢而爲內關不得小便者有或在下之陰虛在上之陽盛不務其德而乘

之致腎氣之不化者必瀉其陽而舉之則陰可得而平也若此條所敘之證皆用吐法蓋因氣道閉塞升降不前者而用耳何嘗捨衆法而獨施是哉丹溪嘗曰吾以吐通小便譬如滴水之器上竅閉則下竅無以自通必上竅開而下竅之水出焉予嘗推是開竅之法用之多驗姑書一二證以明之甲午秋治一婦人年五十初患小便澀醫以八正散等劑展轉小便不通身如芒刺加於體予以所感霖淫雨濕邪尚在表因

小便利通
用蒼朮為君附子佐之發其表一服即汗小便
即時便通又治馬叅政父年八旬初患小便短
澹因服藥分利太過遂致閉塞涓滴不出予以
飲食太過傷其胃氣陷於下焦用補中益氣湯
一服小便通因先多利藥損其腎氣遂致通後
遺尿一夜不止急補其腎然後已凡醫之治是
證未有不用泄利之劑者安能顧其腎氣之虛
哉表而出之以為世戒 有瘀血而小便閉者
宜多用牛膝本事方云頃在毘陵有一貴官妻

妾小便不通臍腹脹痛不可忍眾醫皆作淋治
如入正散之類數種皆治不通病愈甚予診之
曰此血痕也非瞑眩藥不可去乃用桃仁煎初
服至日午大痛不可忍卧少頃下血塊如拳者
數枚小便如黑豈汁一二升痛止得愈此藥猛
峻氣虛血弱者宜斟酌之 大抵小腹痛脹如
覆椀者為實亦分在氣在血氣壅塞於下者木
香流氣飲血汚於下者桃仁煎代抵當丸牛膝
膏 經云腎合膀胱膀胱者津液之府也小腸

屬腎腎上連肺故將兩藏三焦者中瀆之府也
水液出焉是屬膀胱乃腎之府也又云膀胱者
州都之官津液藏焉氣化則能出矣由是言之
膀胱藏水三焦出水治小便不利故刺灸法但
取三焦穴不取膀胱也小腸屬腎肺故東垣用
清肺飲子滋腎丸利小便也 運氣小便不利
有三 其一屬濕邪攻三焦經云太陰在泉濕
淫所勝病小腹痛腫不得小便又云水不及曰
涸流涸流之紀上宮與正宮同其病癰閉是也

其二屬風邪攻脾經云厥陰司天風淫所勝
病澹瘠泄水閉是也 其三屬燥熱經云陽明
司天之政天氣急地氣明民病癰閉初之氣其
病小便黃赤甚則淋又云少陰司天之政地氣
肅天氣明二之氣其病淋是也 良法治小便
不通諸藥不効或轉胞至死危困用猪尿胞一
箇底頭出一小眼子翎筒通過放在眼兒內根
底以細線繫定翎筒子口細杖子堵定上用黃
蠟封尿胞口吹滿氣七分繫定了再用手捻定

翎筒根頭放了黃蠟塞其翎筒在小便出裏頭
放開翎筒根頭手捻其氣透於裏小便即出神
効不

妊娠小便不通

妊娠胎滿逼胞多致小便不
利若胞系了戾小便不通名曰轉胞丹溪以為
多因胎婦虛弱憂悶性躁食味厚古方用滑利
疎導藥鮮効若脬為胎所墜而不通但升舉其
胎胞系疎而小便自行若臍腹作脹而小便淋
瀝此脾胃氣虛胎壓尿胞四物二陳參朮空心

服後探吐數次自安薛氏云前證亦有脾肺氣
虛不能下輸膀胱者亦有氣熱鬱結膀胱津液
不利者亦有金為火燥脾土濕熱甚而不利者
更當詳審施治 金匱要畧問曰婦人病飲食
如故煩熱不得卧而反倚息者何也師曰此名
轉胞不得溺也以胞系了戾故致此病但利小
便則愈宜腎氣丸主之即八味丸酒下十五
丸至二十丸日再服
又云妊娠有水氣重身小便不利灑淅惡寒起
即頭眩葵子茯苓散主之 又云妊娠小便難

小便不通
飲食如故歸母苦參丸主之
丹溪治一婦轉胞小便閉脉似瀦重取則弦左稍和此得之憂患瀦為血少氣多弦為有飲血少則胞不舉氣多有飲中焦不清而溢則胞知所避而就下故墜以四物湯加參朮半夏陳皮甘草生薑空心飲隨以指探吐之俟氣定又與至八貼而安此恐偶中後又治數人皆効
又一婦四十一歲孕九月轉胞小便閉脚腫形瘁脉左稍和而右瀦此飽食氣傷胎系弱不能自舉而下墜壓着

膀胱偏在一邊氣急為其所閉所以水竅不能出也宜補血養氣氣血既正胎系自舉則不下墜方有安之理遂用人參當歸身尾白芍藥白朮陳皮炙甘草半夏生薑煎湯濃與四貼次早以香煎頓服探吐之小便即通皆黑水後就此方加大腹皮枳殼青葱葉砂仁二十貼與之而得以安產
一孕婦小便不通脉細弱乃氣血俱虛胎壓膀胱下口用補藥升起恐遲反加急滿令穩婆以香油抹手入產戶托起其胎溺出

如注却以參芪升麻大劑服之。一法將孕婦倒
豎起胎自運溺自出勝手托遠矣。

產後小便不通

舊方用陳皮去白為末空心

酒調一錢外用鹽填臍中却以葱白剝去麤皮
十餘根作一縛切作一指厚安鹽上用大艾炷
滿葱餅上以灸之覺熱氣入腹內即時便通
按此唯氣壅不得通者宜之若氣虛源涸與
夫熱結者不可泥也。

淋 胞痺

淋之為病嘗觀病源候論謂由腎虛而膀胱熱
也膀胱與腎為表裏俱主水水入小腸與胞行
於陰為溲便也若飲食不節喜怒不時虛實不
調藏府不和致腎虛而膀胱熱腎虛則小便數
膀胱熱則水下澀數而且澇則淋瀝不宜故謂
之淋其狀小腹弦急痛引於臍小便出少氣數
及分石淋勞淋血淋氣淋膏淋冷淋其石淋者
有如沙石勞淋者勞倦即發血淋者心主血氣

淋

圭題六

六八

通小腸熱甚則搏於血脉血得熱則流行入胞
中與溲俱下膏淋者肥液若脂膏又名肉淋氣
淋者胞內氣脹小腹堅滿出少喜數尿有餘瀝
冷淋者冷氣客於下焦邪正交爭滿於胞內水
道不宜先寒戰然後便數成淋可謂悉病情矣
考之內經則淋病之因又不止此大綱有二曰
濕曰熱謂太陰作初氣病中熱脹脾受積濕之
氣小便黃赤甚則淋少陽作二氣風火鬱於上
而熱其病淋蓋五藏六府十二經脈氣皆相通

移是故足太陽主表上行則統諸陽之氣下行
則入膀胱又肺者通調水道下輸膀胱脾胃消
化水穀或在表在上在中凡有熱則水液皆熱
轉輸下之然後膀胱得之而熱矣且小腸是心
之府主熱者也其水必自小腸滲入膀胱胞中
諸熱應於心者其小腸必熱胞受其熱經絡胞
移熱於膀胱者則癃溺血是也由此而言初起
之熱邪不一其因皆得傳於膀胱而成淋若不
先治其所起之本止從未流胞中之熱施治未

為善也予嘗思之淋病必由熱甚生濕濕生則水液渾凝結而為淋不獨此也更有入服金石藥者入房太甚敗精流入胞中及飲食痰積滲入者則皆成淋丹溪嘗治一小兒在胎受久服金石藥之餘毒病淋一十五年以紫雪治愈凡治病不求其本可乎○小便澀痛常急欲溺及去點滴莖中痛不可忍者此五淋病生料五苓散加阿膠或車前子末或五苓散益元散等分和服並可吞火府丹佐以導赤散石葦散○若

熱極成淋服藥不效者宜減桂五苓散加水通滑石燈心瞿麥各少許仍研麥門冬草連根車前草白龍草各自然汁和蜜水調下氣淋氣壅不通小便淋結臍下妨悶疼痛瞿麥湯石葦散榆枝湯木香流氣飲氣虛淋八物湯加杜牛膝黃芩汁煎服老人氣虛亦能淋參朮中加水通山梔血受傷者補血行血自愈勿作淋治死血作淋牛膝膏妙但虛人能損胃不宜食千金云用牛膝以酒煮服治小便淋痛肘

後方用牛膝根莖葉亦以酒煮服治小便不利
莖中痛欲死及治婦人血結堅痛如神蓋牛膝
治淋之聖藥也但虛人當用補劑監劑之耳
血淋用側柏葉生藕節車前草等分搗汁調益
元散立効散瞿麥散小薊飲子柿蒂散當歸湯
羚羊角飲雞蘇飲子金黃散髮灰散 戴氏云
血淋一證須看血色分冷熱色鮮者心小腸實
熱色瘀者腎膀胱虛冷若的是冷淋及下元虛
冷血色瘀者並宜漢椒根剉碎不以多少白木

煎候冷進按血多有熱極兼冰化而黑凝者未
可便以為冷也 膏淋鹿角霜丸沉香散沉香
丸磁石丸海金沙散兔絲丸 戴云有似淋非
淋小便色如米泔或便中有如鼻涕之狀此乃
精溺俱出精塞溺道故便欲出不能而痛宜大
兔絲子丸鹿茸丸之類按此即膏淋也 沙石
淋乃是膀胱蓄熱而成正如湯瓶久在火中底
結白碱而不能去理宜清徹積熱使水道通則
沙石出而可愈宜神效琥珀散如聖散石燕丸

淋

走題

獨聖散 石首魚腦骨十箇火煨滑石二錢琥
珀三分俱爲細末每服一錢空心煎木通湯調
下 鱉甲九肋者一箇酥炙令脆爲細末每服
一匙酒調服當下沙石 雄鵲燒灰淋取汁飲
之石卽下 石淋小便時沙石下流塞其水道
痛不可忍經及時日水道不通其氣上攻頭痛
面腫重則四肢八節俱腫其石大者如梅核堅
硬如有稜角其石小者唯碎石相結通下卽碎
宜服此取石方用冬葵子滑石射干知母已上

各一分通草三分爲細末每服二錢半水一盞
半苦竹葉十片同煎取一盞去滓食前熱服又
太府熱頭痛若體氣壯健先進後方藥兩三盞
然後進取石方用麻黃去節羌活射干荆芥穗
紫苑防風知母蔓荊子牽牛各一分半夏二錢
爲細末每服二錢水一盞煎九分去滓食後熱
服 石淋導水用螻蛄七枚以鹽一兩同於新
瓦上鋪蓋焙乾研爲細末每服一錢七温酒調
服 勞淋地黄丸黃芪湯白芍藥丸 冷淋肉

菴蓉丸澤瀉散沉香散檳榔散生附散戴氏云
進冷劑愈甚者此是冷淋宜地髓湯下附子八
味丸有因服五苓散等藥不効用生料鹿茸丸
却愈此皆下元虛冷之故乃劉河間則謂亦由
熱客膀胱鬱結不能滲泄非真冷也 小便淋
莖中痛不可忍相引脇下痛宜參苓琥珀湯
有小便艱澀如淋不痛而痒者虛證也宜八味
丸生料鹿茸丸之類若因思慮過度致淋宜歸
脾湯或辰砂妙香散吞威喜丸或妙香散和五

苓散 汗多而小便赤澀暑月多有此證盛暑
所飲既多小便反澀少而赤緣上停為飲外發
為汗津液不通小腸澀閉則水不運下五苓散
一名導逆內有木桂收汗猪苓澤瀉茯苓分水
道收其在外者使之內又從而利導焉發者斂
之壅者通之義取於此然有虛勞汗多而赤澀
者却是五內枯燥滋腴既去不能生津故溺澀
而赤不宜過用通小使之劑竭其腎水唯當溫
養潤肺十全大補湯養榮湯之類自足選用汗

者心液心主血血榮則心得所養汗止津生不待通而溺自清矣諸失精血及患癰毒入或有小便赤澀之證此亦是枯竭不潤之故並宜前法

胞痺

痺論云小腹膀胱按之內痛若沃以湯澀於小便上為清涕夫膀胱者州都之官津液藏焉氣化則能出矣今風寒濕邪氣客於胞中則氣不能化出故胞滿而水道不通其證小腹膀胱按之內痛若沃以湯澀於小便以足太陽

經其直行者上交巔入絡腦下灌鼻竅則為清涕也 腎著湯 茯苓丸 巴戟丸 腎瀝湯

姪娘淋

乃腎與膀胱虛熱不能制水然姪婦胞繫於腎腎間虛熱而成斯證甚者心煩悶亂名曰子淋也若頸項筋攣語澹甚用羚羊角散若小便澹少淋瀝用安榮散若肝經濕熱用龍膽瀉肝湯若肝經虛熱用加味逍遙散腿足轉筋而小便不利急用八味丸緩則不救若服燥劑而小便頻數或不利用生地

茯苓牛膝黃蘗知母芎歸甘草 若頻數而色黃用四物加黃蘗知母五味麥門玄參 若肺氣虛而短少用補中益氣加山藥麥門 若陰挺痿痺而頻數用地黃丸 若熱結膀胱而不利用五淋散 若脾肺燥不能化生宜黃芩清肺飲 若膀胱陰虛陽無所生用滋腎丸 若膀胱陽虛陰無所化用腎氣丸

產後淋

因熱客於脬虛則頻數熱則澀痛氣虛兼熱血入胞中則血隨小便出而為血淋也

若膀胱虛熱用六味丸 若陰虛而陽無以化用滋陰腎氣丸蓋土生金金生水當滋化源 陳氏云治產前後淋其法不同產前當安胎產後當去血瞿麥蒲黃最為產後要藥 茅根湯主治產後諸淋

診

腎脉滑實為癃瘕 痺脉滑甚為癘瘕 少陰脉數婦人則陰中生瘡男子則氣淋 盛大而實者生虛小而澀者死 下焦氣血乾者死 鼻頭色黃者小便難 素問奇病論病有

淋

卷六

三六

癰者一日數十洩此不足也身熱如炭頸膺如
格人迎躁盛喘息氣逆此有餘也太陰脉細微
如髮者此不足也其病安在名爲何病岐伯曰
病在大陰其盛在胃頗在肺者名曰厥死不治

法
卷之二

十一

小便數

運氣小便數皆屬火經云少陽之復便數憎風
是也小便數唯二藏有之一屬肺經云肺手大
陰之脉氣盛有餘則肩背痛風寒汗出中風小
便數而欠是也以刺言之瀉手太陰則愈一屬
肝經云足厥陰之瘡令人如癰狀而小便不利
又云肝痺者夜卧則驚多飲數小便是也視虛
實補瀉之則愈 數而少茯苓琥珀湯利之
數而多薯蕷蓮肉益智仁之屬收之 生薯蕷

小便數

桂通六

三三

半斤刮去皮以刀切碎於鍋中煮酒沸下薯蕷
不得攪待熟加鹽葱白更添酒空腹下二三盞
妙蓮肉去皮不以多少用好酒浸一兩宿猪
肚一箇將酒浸蓮肉入肚中多半爲度水煮熟
取出蓮肉切焙乾爲細末酒煮麪糊爲丸如芡
實大每服五十九食前米飲湯下名水芝丸
夜多小便益智二十四箇爲末鹽五分水一盞
煎八分臨卧溫服衛真湯并丸桑螵蛸散
戴氏云小便多者乃下元虛冷腎不攝水以

致滲泄宜兔絲子丸八味丸玄兔丹生料鹿茸
丸有人每自從早至午前定尿四次一日之
間又自無事此腎虛所致亦猶脾腎泄早泄而
晚愈次日又復然者也若小便常急徧數雖
多而所出常少放了復急不澀痛却非淋證亦
有小便畢少頃將謂已盡忽再出些少者多因
自忍尿或忍尿行房事而然宜生料五苓散減
澤瀉之半加阿膠一錢吞加減八味丸此丸須
用五味子者有盛喜致小便多日夜無度乃

喜極傷心，心與小腸為表裏，宜分清飲四七湯各半貼和煎，仍以辰砂妙香散吞，小兒絲子丸或玄兔丹。若頻頻欲去而溺不多，但不痛耳，此腎與膀胱俱虛，客熱乘之，虛則不能制水，宜補腎丸六味地黄丸。熱入水道，澀而不利，八正散或五苓散加黃蘗知母麥門冬木通。大便硬，小便數者，是謂脾約，脾約丸主之。

小便不禁

原病式云：熱甚客於腎部，干於足厥陰之經，廷孔鬱結極甚，而氣血不能宣通，則痿痺神無所用。故津液滲入膀胱而旋溺遺失，不能收禁也。攷之內經，則謂督脈生病為遺溺，靈樞謂肝所生病為遺溺，蓋因二經循陰器，繫廷孔，病則榮衛不至，氣血勞劣，莫能約束水道之竅，故遺失不禁。劉河間可謂得此旨矣。然內經復言膀胱不約為遺溺，靈樞言手太陰之別名曰列缺，其

小便不赤
病虛則欠故小便遺數由此觀之則又不獨病
在陰器廷孔而已夫如是者內由三焦決瀆之
失常也何則手少陽之脈從缺盆布臆中下膈
循屬三焦足太陽之脈從肩膊內挾脊抵腰中
入循脊屬膀胱三焦虛則膀胱虛故不約也肺
從上焦通調水道下輸膀胱腎又上連肺故將
兩藏是子母也母虛子亦虛此上中下三焦氣
虛皆足以致遺溺矣由是而知三焦所部五藏
之淫氣變而為五邪者悉能于於下焦腎肝膀

胱出水之竅而為不禁之病何止於熱極鬱結
痿痺腎部而已乎又自內經所謂太陰在泉客
勝濕客下焦溲便不時太陰之復甚則入腎竅
泄無度者觀之則知濕主於痞況是所勝之邪
其不為鬱結痿痺者乎從而思之聖人之言舉
一隅便當以三隅反前所謂肝腎膀胱之病不
言其邪可見諸邪盡能病之也次言手太陰列
缺虛者為子母藏氣之要也可見所生所勝不
勝之五邪皆足以乘之也其言太陰之勝復則

濕為所勝之重者也其他風寒燥熱雖不及言
可知在其中矣 治法上虛補氣 下虛潤脫
東垣云小便遺失者肺金虛也宜安臥養氣
禁勞役以黃芪人參之類補之不愈當責有熱
加黃蘗生地 下虛謂膀胱下焦虛經云水泉
不止者是膀胱不藏也仲景云下焦竭則遺溺
朱便其氣不能自禁制不須治久則愈又云下
焦不歸則遺洩世用桑螵蛸雞脬脰之類是也
古方多燥熱如一氣丹家韭子丸兔絲子丸

固脬丸白茯苓散鹿茸散兔絲子散內有桂附
唯真虛寒者宜之 桑螵蛸散鹿角霜丸阿膠
飲鹿茸散溫補而不僭 小便不禁而淋瀝澀
滯者澤瀉散茯苓丸 滑脫者牡蠣丸 如白
薇散雞腸散內俱有寒藥內熱者宜之 臬全
善治一男子遺溺不覺脉洪大盛以黃蘗知母
杜牛膝為君青皮甘草為臣木香為佐桂些少
反佐服數貼大効此法與千金白薇散皆河間
所謂熱甚廷孔鬱結神無所用不能收禁之意

也 遺尿有實熱者用神芎導水丸每服百丸
空心白湯下若一服利止後服此謂淫氣遺溺
痺聚在腎痺謂氣血不通宜也 戴云睡着遺
尿者此亦下元冷小便無禁而然宜大兔絲子
丸猪胞灸碎煎湯下凡遺尿皆屬虛 通用方
薏苡仁鹽炒煎服 雞腸一具以水三升煮取
一升分三服一方用雄雞燒灰為末用三指撮
溫漿水調一錢向北斗服之更良 雄雞喉嚨
及矢白腔裏黃皮燒為末麥粥清調服 羊

脬盛水貯令滿繫兩頭煮熟開取水頓服之
雞腔脬一具并腸洗淨燒灰男用雌女用雄為
細末每服二錢空心溫酒調服一方加猪脬灰
燕蓐草主眠中遺尿不覺燒令黑研水進方
寸匕 膀胱效者效而遺溺

姪娘尿出不知

用白薇芍藥為末酒調下或
白礬牡蠣為末酒調二錢或雞毛灰末酒服一
匕或灸桑螵蛸益智仁為末米飲下 薛氏云
前證若脬中有熱宜加味道遙散若脾肺氣虛

宜補中益氣湯加益智若肝腎陰虛宜六味丸
產後小便數 乃氣血不能制故也 薛氏曰
若因穩婆不慎以致胞損而小便淋瀝者用八
珍湯以補氣血兼進補脾飲若因膀胱氣虛而
小便頻數當補脾肺若膀胱陰虛而小便淋瀝
須補肺腎

婦人產後產理不順致傷膀胱遺尿無時宜補
脾飲桑螵蛸散白薇散薛氏曰前證若脾肺陽
虛用補中益氣湯若肝腎陰虛用六味地黃丸

若肝腎之氣虛寒用八味地黃丸若肝脾氣血
虛熱用加味逍遙散佐以六味丸 丹溪云嘗
見尿胞因收生者不謹以致破損而得淋瀝病
遂為廢疾有婦年壯難產得此因思肌肉破傷
在外者可以補完胞雖在腹恐亦可治診其脉
虛甚遂與峻補以參芪為君芩歸為臣桃仁陳
皮黃芪茯苓為佐煎以猪羊胞中湯極饑時飲
之但劑小者率用一兩至一月而安蓋令氣血
驟長其胞自完恐稍緩亦難成功矣

小便黃赤者，此由熱也。熱者，水液渾濁，皆屬於熱。小便黃者，少腹中
 有熱也。藏府，小便黃有四：一屬肝熱，經云：肝熱病者，小便先黃，是也。二屬胃實，經云：胃
 足陽明之脈，氣盛則身已前皆熱，其有餘於胃，則消穀善饑，溺色黃，是也。三屬肺虛，經云：肺
 手太陰之脈，氣虛則肩背痛，寒少氣不足以息，溺色變，是也。四屬腎虛，經云：冬脈者，腎脈也，
 冬脈不及，則令人眇，清脊痛，小便變，是也。運

小便黃赤

諸病水液渾濁，皆屬於熱。小便黃者，少腹中
 有熱也。藏府，小便黃有四：一屬肝熱，經云：肝
 肝熱病者，小便先黃，是也。二屬胃實，經云：胃
 足陽明之脈，氣盛則身已前皆熱，其有餘於胃，
 則消穀善饑，溺色黃，是也。三屬肺虛，經云：肺
 手太陰之脈，氣虛則肩背痛，寒少氣不足以息，
 溺色變，是也。四屬腎虛，經云：冬脈者，腎脈也，
 冬脈不及，則令人眇，清脊痛，小便變，是也。運

小便黃有二 一屬風經云厥陰之勝肝腸
氣并化而為熱小便黃赤是也 二屬熱經云
少陰司天熱淫所勝病溺色變又云少陽之勝
溺赤善驚又云陽明司天燥氣下臨暴熱至乃
暑陽氣鬱發小便變是也蓋暴熱謂地氣少陰
之執也 邪之所在皆為不足中氣不足溲便
為之變補足外燥下留之用藥則補中益氣湯
是已 小便黃無如黃蘗知母効 脉經云尺
濇足脛逆冷小便赤宜服附子四逆湯足太衝

補之

小便黃赤

遺精

丹溪書分夢遺精滑為二門蓋夢與鬼交為夢遺不因夢感而自遺者為精滑然總之為遺精也其治法無二故合之或問精滑何因得之曰金匱要畧謂虛勞之病脉浮大手足煩陰寒精自出又謂脉弦而大此名革亡血失精又謂小腹弦急陰頭寒脉動微緊男失精女子夢交通巢氏病源以虛勞病分出五勞七傷六極二十三蒸之名於七傷中精連蒸病中玉房蒸男

遺精

準綱六

八五

則遺瀝漏精與尿精聞見精出及失精等候皆混同仍類虛勞門爲腎主藏精故盡作腎氣衰弱之病似若他藏無損焉豈其然哉夫五藏皆藏精者也嘗攷靈樞本神篇首謂天之在我者德也地之在我者氣也德流氣薄而生者也故生之來謂之精兩精相搏謂之神如是者通言一身主宰之精神也因心腎是水火之藏法天地施化生成之道故藏精神爲五藏之宗主其次言所以任物者謂之心心有所憶謂之意

有所存謂之志因志而存變謂之思因思而遠慕謂之慮因慮而處物謂之智如是者皆因心神隨物所感變而分之是謂五志遂有五神藏之名五神既分則於德化政令性味各司其屬者之用於是心腎之水火亦俯從五神之列然而所主之精神則並行未始相離而五神五變者分之如此則精亦從神之所變隨處與之合矣故五藏各得藏其精神以行其用是之謂藏真主所以屬本氣之生化者也苟有一藏之真

遺精
不得其正則一藏之病作矣苟一藏之精神傷
之甚者則必害其心腎之主精神者如所謂
怵惕思慮則傷神神傷則恐懼流淫而不止喜
樂恐懼則傷精精傷則骨痠痿厥而不舉喜樂
者憚散而不藏恐懼者蕩燂而不收是故主藏
精者不可傷傷則失守而陰虛陰虛則無氣無
氣則死矣如是者精神之在五藏傷之則淫邪
立至心之在志為喜在氣為火為熱腎之在志
為恐在氣為水為寒於是怵惕思慮傷其神神

傷則火動不止火動不止則腎水恐懼之志者
并矣恐甚不解則動中而腎自傷腎主藏精與
所受五藏六府所輸至之精皆不得藏而時自
下矣此乃以心腎主宰精神者言也至若他藏
之精各得而泄有所據乎曰內經所謂思想無
窮所願不得意淫於外入房太甚宗筋弛縱發
為白淫其病筋痿筋痿者生於肝使內王註以
白淫是白物淫衍如精之狀因洩而下雖云如
精殆非將化未成之精而徑出者乎何以言之

精有謂生來之精者先身生之精也有謂食氣入胃散精於五藏者有謂水飲自脾肺輸腎而四布五經並行之精者此水穀日生之精也然飲食日生之精皆從生來元精之所化而後分布其藏盈溢則輸之於腎腎乃元氣之本生成之根以始終化之養之之道也若飲食之精遇一藏有邪則其藏之食味化之不全不得入與元精俱藏而竟泄出與夫所謂脾移熱於腎少腹寃熱而痛出白者義亦如之王註雖謂消脂

燖肉無乃消其腎所藏之精歟蓋使一藏無病則此白物其不為精乎使一藏有病則所藏之精其不變為白物而出之乎以此比例則肺脾二藏之精寧不有似肝藏之傷神動氣致精失守而走泄者乎然則治當何如曰獨腎泄者治其腎由他藏而致腎之泄者則兩治之在他藏自泄者治其本藏必察四屬以求其治大抵精自心而泄則血脉空虚本縱不收自肺而泄者皮革毛焦喘急不利自脾而泄者色黃肉消四

肢懈惰自肝而泄者色青而筋痿自腎而泄者
色黃黑髓空而骨惰即脉亦可辨也 或問夜
夢交接之理何如曰內經曰腎者主水受五藏
六府之精而藏之又曰主蟄封藏之本精之處
也又曰陰陽之要陽密乃固故陽強不能密陰
氣乃絕陰平陽秘精神乃治陰陽離決精氣乃
絕又曰陰陽總宗筋之會會於氣街靈樞淫邪
發夢篇曰厥氣客於陰器則夢接內蓋陰器者
宗筋之所繫也而足太陰陽明少陰厥陰之筋

皆結聚於陰器與衝任督三脉之所會然厥陰
主筋故諸筋皆統屬於厥陰也腎為陰主藏精
肝為陽主疎泄陰器乃泄精之竅是故腎之陰
虛則精不藏肝之陽強則氣不固若遇陰邪客
於其竅與所強之陽相感則精脫出而成夢矣
所謂陽強者非藏之真陽強也乃肝藏所寄之
相火強耳蓋水為陰火為陽故通言火為陽然
分言之則為二若火盛不已反消亡其藏之真
陽也肝乃魂之居藏之真陽虛則遊魂為變變

則為夢與肝虛病者多夢亡人無異曰如子所
言夢遺則從肝腎得之乎曰不然病之初起亦
有不在腎肝而在心肺脾胃之不足者然必傳
於肝腎而後精方走也蓋有自然相傳之理存
焉何則宗筋者上絡胸腹挾臍下合橫骨故內
經謂其總陰陽之會會於氣街主束骨而利機
關也夫五藏俱有火其相火之寄於肝者善則
發生惡則為害獨甚於他火故平人肝氣之剛
勇充於筋而為罷極之本也其陰器既宗筋之

所聚乃強於作用皆相火充其力也若遇接內
得陰氣與合則三焦上下內外之火翕然而下
從百體玄府悉開其滋生之精盡趨會於陰器
以躍出豈止腎之所藏者而已哉所謂厥氣客
於陰器則夢者其厥氣亦身中陰分所逆之氣
與接內之氣同是陰類故夢猶接內之精脫也
若思欲不已精氣已客於陰器至卧故成夢而
泄矣但夢者因真陽虛而得之故精脫之後其
氣未能卒復未免形體衰憊不比平人接內之

遺精
氣一上二時便可復也曰治法當何如曰病從他
藏而起則以初感病者為本腎肝聚病處為標
若由腎肝二藏自得者獨治腎肝由陰陽離決
水火不交通者則既濟之陰陽不相抱負者則
因而和之陽虛者補其氣陰虛者補其血陽強
者瀉其火火有正治反治從多從少隨其攸利
經曰思想無窮所願不得意淫於外入房太
甚宗筋弛縱發為白淫夢遺等證先賢治法有
五其一用辰砂磁石龍骨之類鎮墜神之浮

游河間秘真丸本事八仙丹之屬是也 其二
思想結成痰飲迷於心竅而遺者許學士用猪
苓丸之類導利其痰是也 其三思想傷陰者
潔古珍珠粉丸海藏大鳳髓丹本事清心丸丹
溪用海蛤粉青黛香附黃蘗知母之類降火補
陰是也 其四思想傷陽者謙甫鹿茸菴蓉兔
絲子等補陽是也 其五陰陽俱虛者丹溪治
一形瘦人便濁夢遺作心虛治用珍珠粉丸定
志丸服之是也 戴氏云遺精得之有四有用

心過度心不攝腎以致失精者有因思色欲不遂致精失位輸瀉而出者有色欲太過滑泄不禁者有年壯氣盛久無色欲精氣滿泄者然其狀不一或小便後出多不可禁者或不小便而自出或莖中出而痒痛常如欲小便者並宜先用辰砂妙香散吞玉華白丹佐以威喜丸或分清飲別以綿裹龍骨同煎或分清飲半貼加五倍牡蠣粉白茯苓五味子各半錢失精夢泄亦有經絡熱而得者若以虛冷用熱劑則精愈

失本事方清心丸用黃蘗腦子者最良大智禪師云夢遺不可全作虛冷亦有經絡熱而得之者嘗治

一男子至夜脊心熱夢遺用珍珠粉丸猪苓丸遺止終服紫雪脊熱始除又一男子脉洪腰熱遺精用沉香和中丸下之導赤散治其火而愈於此知身有熱而遺者皆熱遺也若是用心過度而得之宜

遠志丸用交感湯加蓮肉五味子吞下仍佐以靈砂丹若審是思色欲不遂得之且以四七

湯吞白丸子甚者耳聞目見其精即出名曰白淫妙香散吞玉華白丹初虞世方治清滑不

禁若審是色欲過度下元虛憊泄滑無

遺精

圭編六

九三

禁宜正元飲加牡蠣粉肉苁蓉各半錢吞養氣丹或靈砂丹仍佐以鹿茸丸山藥丸大兔絲子丸固陽丸之類按此項藥太燥若妄用過劑肉骨立筋痿而成不救之疾矣用者審之若審是壯盛滿溢者本

事方清心丸 夢遺俗謂之夜夢鬼交宜溫膽湯去竹茹加人參遠志蓮肉酸棗仁炒茯苓各半錢吞玉華白丹固陽丸夢遺亦備前四證宜審其所感用前藥 婁全善云愚壯年得夢遺症每四五十日必一遺累用鳳髓丹河間秘真

丸雖少効終不除根後改用菖蒲遠志韭子桑螵蛸益智酸棗仁牡蠣龍骨瑣陽等劑為丸服之良愈又一中年男子夢遺以珍珠粉丸等藥與服了無一効亦以遠志菖蒲等劑服之隨手而愈 又云王元珪虛而泄精脉弦大累與加減八物湯吞河間秘真丸及珍珠粉丸其泄不止後用五倍子一兩茯苓二兩為丸服之良愈此則五倍子澀脫之功敏於龍骨牡蠣也 又云詳古治夢遺方屬鬱滯者居大半庸醫不知

其鬱但用龍骨牡蠣等澀劑固脫殊不知愈瀉愈鬱其病反甚嘗治一壯年男子夢遺白濁少腹有氣衝上每日腰熱卯作酉涼腰熱作則手足冷前陰無氣腰熱退則前陰氣耕手足温又且多下氣暮多噫時振隔一旬二旬必遺脉且弦滑而大午洪大予知其有鬱滯也先用沉香和中丸大下之次用加減八物湯吞滋腎丸百粒若稍與蛤粉等瀆藥則遺與濁反甚或一夜二遺遂改用導赤散大劑煎湯服之遺濁皆止

漸安又一中年男子夢遺醫或與瀆藥反甚連遺數夜愚先與神芎丸大下之却製猪苓丸服之皆得痊安又丹溪治鎮守萬戶蕭伯善便濁精滑不禁百藥不効與試倒倉法而安於此見夢遺屬鬱滯者多矣 葉氏云遺滑之證予累見人多作腎虛而用補澀之藥無効殊不知此因脾胃濕熱所乘飲酒厚味痰火之人多有此疾腎雖藏精其精本於脾胃飲食生化而輸於腎若脾胃受傷濕熱內鬱使中氣滯而不清則

遺精
九十五
所輸皆濁氣邪火擾動水不得而安靜故遺滑也治以蒼白二陳湯加黃蘗升麻柴胡俾清氣升濁氣降而脾胃健運則遺滑自止矣其有欲心太熾思想無窮而致者當從心治心清則神寧而火不妄起宜遠志九茯神湯房勞無度致腎虛者必兼見怯弱等證方可用補腎藥故治有多端須當審察不可偏作腎虛治也 趙以德治鄭叔魯二十餘歲攻舉子業讀書夜至四鼓猶未已遂發此病卧間玉莖但着被與腿便

夢交接脫精懸空則不夢飲食且減倦怠少氣此用心太過二火俱起夜不得睡血不歸肝腎水不足火乘陰虛入客下焦鼓其精房則精不得聚藏而欲走因玉莖着物猶厥氣客之故作接內之夢於是上補心安神中調脾胃升舉其陽下用益精生陰固陽之劑不三月而病安矣 一老人年六十患瘡嗽自服四獸飲多積成濕熱乘於下焦幾致危困診其脉尺部數而有方與補中益氣加涼劑二十日與黃蘗九次早診

之尺脉頓減問之曰夜來夢交接否曰然幸不
泄曰年老精衰固無以泄其火熱結於精房者
得泄火益陰之藥其火散走於陰器之竅病可
減矣再服二十日又夢其瘡嗽全愈 亦有鬼魅
相感者大全良方論婦人夢與鬼交者由藏府
虛神不守故鬼氣得爲病也其狀不欲見人如
有對晤時獨言笑或時悲泣是也脉息乍大乍
小乍有乍無皆鬼邪之脉又脉來綿綿不知度
數而顏色不變亦其候也夫鬼本無形感而遂

通蓋因心念不正感召其鬼附邪氣而入體與
相接所以時見於夢治之之法則朱砂雄黃麝
香鬼箭虎頭骨辟邪之屬是也 蔣右丞子每
夜有夢招以德治之連二日診脉觀其動止終
不舉頭但俯視不正當人知爲陰邪相着叩之
不肯言其所交之鬼狀其父遂問隨出之童僕
乃言一曰至城隍廟見侍女以手於其身摩久
之三五日遂聞病此卽令法師入廟毀其像小
腹泥土皆濕其病卽安 試觀張仲景治下焦

遺精
九七
真陽與精血兩虛病小腹弦急脉芤動微緊男子失精女子夢交通則用桂枝龍骨之屬溫之固之若陽浮上而不降作悸衄手足煩熱咽乾口燥陰獨居於內而為裏急腹中痛夢失精者小建中湯和之皆可取以為法也 醫家大法曰嘗治脫真不止者以澀劑收止之則不能收不能止不若瀉心火若瀉心火不能止之不若用升陽之劑加風藥之類止之非此能止之也舉其氣上而不下也

赤白濁

溺與精所出之道不同淋病在溺道故綱目列之肝膽部濁病在精道故綱目列之腎膀胱部今患濁者雖便時莖中如刀割火灼而溺自清唯竅端時有穢物如瘡膿目眵淋漓不斷初與便溺不相混濫猶河中之濟焉至易辨也每見時醫以淋法治之五苓八正雜投不已而增劇者不可勝數予每正之而其餘尚難以戶說也蓋由精敗而腐者什九由濕熱流注與虛者什

一 丹溪云屬濕熱有痰有虛赤屬血由小腸
屬火故也白屬氣由大腸屬金故也或曰思慮
過度嗜欲無窮脾心腎不交精元失守以為赤
白二濁之患赤濁者為心虛有熱由思慮而得
之白濁者為腎虛有寒因嗜欲而得之葉氏曰以赤白濁均屬於熱其辨甚明然因於虛寒者不可謂無如上所言是也但熱多寒少耳虛熱者清心蓮子飲虛寒者草薢分清飲白濁有濕痰流注宜燥中宮之濕赤者濕傷血也 有胃中濁氣下流滲入膀胱而白濁者蒼白二陳湯加升提之劑 虛

勞者用補陰藥胃弱者參朮加升麻柴胡 心經伏暑赤濁者四苓散加香薷麥門冬人參石蓮肉 戴氏云有白濁人服玄兔丹不愈服附子八味丸即愈者不可不知 有小便如常停久纔方定濁有小便出即如米泔若小兒疳病者宜分清飲加茯苓半錢下小兒絲子丸 如服藥未效宜四七湯吞青州白丸子及辰砂妙香散吞玄兔丹及小兒絲子丸山藥丸如白濁甚下淀如泥或稠粘如膠頻逆而澀痛異常此

赤白濁
九
非是熱淋此是精濁室寒竅道而結宜五苓妙
香散吞八味丸小兔絲子丸或草薢分清飲
精者血之所化有濁去太多精化不及赤未變
白故成赤濁此虛之甚也何以知之有人天癸
未至強力好色所泄半精半血若溺不赤無
他熱症縱雖赤濁不可以赤為熱只宜以治白
濁法治之若溺赤下濁亦赤口渴時發熱者
辰砂妙香散吞靈砂丹或清心蓮子飲發熱不
退口燥舌乾之甚者此乃精虧內燥腎枯不潤

四物湯吞玄兔丹和加減八味丸久服乃效既按
熱燥如此此而用藥無一涼補濡潤之劑非其治也曷若以生地麥門冬五味鹽炒黃芪淡竹葉地骨皮山藥之類治之
或問丹溪云白濁之病因何與
前人所論不同將古今異也子能與我折衷乎
曰辨古今之得失必以內經證之是病自巢氏
病源候論曰白濁者由勞傷腎腎氣虛冷故也
由是歷代方論宗其說無異詞不唯白濁之理
不明所治之法亦誤不思內經本無白濁之名
唯言少陰在泉客勝溲便變少陽在泉客勝則

赤白濁
建通
七

溲白又言思想無窮入房太甚發為白淫與脾
移熱於腎出白二者皆隨溲而下夫如是非白
濁之源乎原病式因舉內經謂諸病水液渾濁
皆屬於熱言天氣熱則水渾濁寒則清潔水體
清火體濁又如清水為湯則自然白濁也可謂
發聖人之旨以正千載之誤矣然不讀其書者
世猶未盡知斯道也予嘗聞先生論白濁多因
濕熱下流膀胱而成赤白濁即靈樞所謂中氣
不足溲便為之變是也必先補中氣使升舉之

而後分其藏府氣血赤白虛實以治與夫其他
邪熱所傷者固在瀉熱補虛設腎氣虛甚或火
熱亢極者則不宜峻用寒涼之劑必以反佐治
之要在權衡輕重而已 痿論曰思想無窮所
願不得意淫於外入房太甚宗筋弛縱發為筋
痿及為白淫夫腎藏天一以慳為事志意內治
則精全而瀆若思想外淫房室太甚則固有淫
泆不守輒隨溲溺而下也然本於筋痿者以宗
筋弛縱也宜內補鹿茸丸茯苓丸金箔丸珍珠

粉丸

診 脉洪大而濇按之無力或微細或沉緊而濇為元氣不足若尺脉虛或浮者急疾者皆難治遲者易治

前陰諸疾 陰縮陰縱 陰痿 陰汗臊臭 陰冷陰痒 陰腫痛 陰吹

前陰諸疾

陰縮陰縱 陰冷陰痒

陰痿 陰腫痛

陰汗臊臭 陰吹

前陰所過之脉有二一曰肝脉二曰督脉經云足厥陰之脉入毛中過陰器抵少腹是肝脉所過也又云督脉者起於小腹以下骨中央女子入繫廷孔循陰器男子循莖下至篡與女子等是督脉所過也

陰縮陰縱

陰縮謂前陰受寒入腹內也陰縱謂前陰受熱挺長不收也經曰足厥陰之筋傷於寒則陰縮入傷於熱則縱挺不收治在行水

清陰氣是也 丹溪治鮑兄二十餘歲玉莖挺
長腫而痿皮塌常潤磨股不能行兩脇氣上手
足倦弱先以小柴胡加黃連大劑行其濕執畧
加黃蘗降其逆上之氣其挺腫漸收漸減及半
但莖中有堅塊未消遂以青皮為君佐以散風
之劑末服外以絲瓜汁調五倍子末傅而愈
平江王氏子年三十歲忽陰挺長腫而痛脉數
而實用朴硝荊芥湯浸洗又用三一承氣湯太
下之愈 內經刺灸前陰挺長之法有一經云

足厥陰之別名曰蠡溝去內踝五寸別走少陽
其病實則挺長取之所別是也 內經診陰縮
而死者皆屬肝傷經云肝悲哀動中則傷魂魂
傷則狂妄不精不精則不正當陰縮而攣筋兩
脇骨不舉毛悴色天死於秋又云厥陰終者喜
溺舌卷卵上縮是也

陰痿 陰痿皆耗散過度傷於肝筋所致經云
足厥陰之經其病傷於內則不起是也 腎脉
大甚為陰痿 運氣陰痿皆屬濕土制腎經云

前陰言形 卷六 百三

太陰司天濕氣下臨腎氣上從陰痿氣衰而不
舉是也 仲景八味丸治陽事多痿不振今依
前方夏減桂附一半春秋三停減一疾去精足
全減桂附只依六味地黄丸此法可治傷於內者陰痿
弱兩丸冷陰汗如水小便後有餘滴臊氣尻醫
并前陰冷惡寒而喜熱膝亦冷此肝經濕熱宜
固真湯柴胡勝濕湯此法可治濕氣制腎者腎脉大右
尺尤甚此相火盛而反痿宜滋腎丸或鳳髓丹
陰汗臊臭陰冷陰瘰 陰汗濕痒用大蒜煨剝

去皮爛研同淡荳豉末搜和丸桐子大朱砂為
衣每服二十九棗二枚燈心數莖煎湯空心送
下 陰汗不止內服青蛾丸外用爐甘石一分
真蛤粉半分乾撲或蜜佗僧和蛇牀子研末撲
之 東垣治一富者前陰間常聞臊臭又因連
日飲酒腹中不和夫前陰者足厥陰之脉絡陰
器出其挺末臭者心之所走散入於五方為臭
入肝為臊臭此其一也當於肝經中瀉行間是
治其本後於心經中瀉少衝以治其標如惡針

前陰者天 卷之六

前陰言
當用藥除之治法當求其本連日飲酒夫酒者
氣味俱能生濕熱是風濕熱合於下焦為邪故
經云下焦如瀆又云在下者引而竭之酒者是
濕熱之水亦宜決前陰以去之是合下焦二法
治之宜龍膽瀉肝湯柴胡入肝為引用澤瀉車
前子木通其淡滲之味利小便亦除臊臭是謂
在下者引而竭之生地黄草龍膽之苦寒瀉酒
濕熱更兼車前子之規以徹肝中邪氣肝主血
用當歸以滋肝中血不足也 面色痿黃身黃

脚軟弱無力陰汗陰莖有天色宜溫腎湯 前
陰如米冷并冷汗兩脚痿弱無力宜補肝湯
溺黃臊臭淋瀝兩丸如米陰汗浸兩股陰頭亦
冷正值十二月天寒凜冽霜雪交集寒之極矣
宜清震湯 兩外腎冷兩髀樞陰汗前陰痿弱
陰囊濕痒臊氣宜柴胡勝濕湯 千金方有人
陰冷漸漸冷氣入陰囊腫滿恐死日夜痛悶不
得眠取生椒擇之洗淨以布帛裹着丸囊冷厚
半寸須臾熱氣大通日再易之取出瘥 本事

方曾有入陰冷漸次冷氣入陰囊腫滿晝夜悶
疼不得眠煮大薊汁服立瘥 前陰兩丸濕痒
秋冬尤甚冬月減宜椒粉散 腎囊濕痒先以
吳茱萸煎湯洗之後用吳茱萸半兩寒水石三
錢黃蘗二錢半樟腦蛇牀子各半兩輕粉一錢
白礬二錢硫黃二錢檳榔三錢白芷三錢爲末
搽之

陰腫痛

風熱客於腎經腎虛不能宣散而腫
發歇疼痛聖惠沉香散沉香五錢檳榔一兩丹

參赤芍藥白蒺藜去刺炒製枳殼赤茯苓各七
錢半空心溫服 腫而有氣上下攻注脹悶聖
惠木香散木香半兩赤茯苓一兩牡丹皮澤瀉
各七錢半防風半兩檳榔一兩郁李仁一兩湯
浸去皮微炒爲末食前溫酒服 小蟠葱散五
苓散生料和四兩重依方加檳榔半兩茴香炒
八錢川練肉半兩薑葱煎空心服 腫痛不可
忍雄黃二兩研白礬二兩甘草二尺煮米三升
稍熟浴之又雞翅燒灰爲末空心粥飲調下

前門身醫務 卷六 百六
錢患左取左翅患右取右翅又取伏龍肝以雞
子白和傅之又馬齒莧搗汁或桃仁去皮搗爛
或蛇牀子末雞子黃和二著各可傅之痛用
苦練樹向陽根木香吳茱萸檳榔為末醋糊丸
熱酒不拘時服卒痛如刺大汗出小蒜一升
韭根一斤楊柳根一斤剉酒三升煎沸乘熱熏
之陰莖痛是厥陰經氣滯兼熱用甘草稍蓋
欲緩其氣耳若病淋而作痛似難一槩論之必
須清肺氣而清濁自分矣氣虛六君血虛四物

等各用黃蘗知母滑石石葦琥珀之類婦人
陰腫腎痛枳實半斤切碎炒熱布裹包熨之冷
即易

陰吹 胃氣下泄陰吹而正喧此穀氣之實也
膏髮煎導之

[Faint bleed-through text from the reverse side of the page]

疝

或問疝病古方有以為小腸氣者有以為膀胱氣者唯子和丹溪專主肝經而言其說不同何以辨之曰小腸氣小腸之病膀胱氣膀胱之病疝氣肝經之病三者自是不一昔人以小腸膀胱氣為疝者誤也殊不知足厥陰之經環陰器抵少腹人之病此者其發畢九脹痛連及少腹則疝氣之係於肝經可知矣小腸氣俗謂之橫弦豎弦遠臍走注少腹攻刺而膀胱氣則在毛

疝
疝
疝

際之上小腹之分作痛與疝氣之有形如瓜有聲如蛙或上於腹或下於囊者不同也但小腸膀胱因經絡並於厥陰之經所以受病連及於肝則亦下控引睪丸為痛然止是一經之病不可以為疝也 趙以德曰此條本為睪丸之症立名然內經以疝者痛也有腹中藏府之痛一以疝而名著故通敘於此其腹中五藏之疝得以就此而考焉有睪丸之痛內經謂任脉為病男子內結七疝女子帶下瘕聚衝脉為病逆氣

裏急然稱任脉有七疝名無疝之狀及按諸篇以雙字命其名者曰癰疝者以三陽為病發寒熱痿厥其傳為癰疝及陽明司夫與之勝肝是動病足陽明筋病皆為瘕疝謂瘕疝者面黃脉之至大有虛有積氣在腹中瘕氣名曰瘕疝謂疝瘕以脾傳邪之間病名疝瘕少腹寃熱而痛出白一名曰蠱謂衝疝者以衝任督生病上衝心痛不得前後謂卒疝者邪客厥陰之絡則卒疝暴痛與厥陰別蠱溝氣逆亦睪丸卒痛謂瘕

癰疽者厥陰之陰盛而脈脹不通謂狐疽者肝
所生病也殆非及此雙字之名者由任脈行諸
經之會而有七疽者歟此外獨稱一字疽者則
有太陰在泉主勝寒氣厥陽甚則為疽有太陽
在泉小腹控睪上引心痛有小腹痛不得大小
便名曰疽得之寒有足太陰筋病陰器紐痛上
引臍有心疽脈急小腸為使小腸當有形有腎
脈太急深皆為疽心脈搏滑急為心疽肺脈沉
搏為肺疽三陰急為疽靈樞有謂心疽肝脈滑

甚為癘疽脾脈微大為疽氣腹中裹太膿血在
腸胃之外滑甚為癘癘腎脈滑甚為癘癘諸脈
之滑者為陽氣甚盛微有熱夫如是者名為七
疽中分邪氣之寒熱者也內經又云少陽脈滑
病肺風疽太陰脈滑病脾風疽陽明脈滑病心
風疽太陽脈滑病腎風疽少陽脈滑病肝風疽
所言風者非外入之風由肝木陽藏動之風也
故經云脈滑曰風然連以疽稱者蓋腎肝同居
下焦而足厥陰佐任脈之生化因肝腎之氣並

逆所以任之陰氣爲疝肝之陽氣爲風所以風疝連稱也李東垣謂脉滑者爲丙丁火熱併於下不勝壬癸從寒木之化故生癩疝亦用熱治內經初不見於尺部而言也豈不爲外寒鬱內熱之故乃曰熱火從寒化恐理未當而經更有莖垂者身中之機陰精之候津液之道也或飲食不節喜怒不時津液內溢下流於畢血道不通日久不休俛仰不便趨翔不能此病榮然有水不上不下若此者亦癩疝之一也張仲景言

疝皆由寒邪得之亦同內經之云脉者當溫散之或曰內經言疝似若各從諸經脉所生今字何爲盡屬於任脉乎曰任脉是疝病之本源各經是疝病之支流何以言之蓋腎藏以四方分部者言則屬五行之寒水以居在下位者言則屬地道之陰陰形偶故腎有兩兩其形則地道之剛柔立焉包居兩形之間出納腎藏之精血以行坤土之化生成百骸萬象及夫生長壯者已之天癸與作強伎巧之用悉在於斯然而坤

土居尊不自司其職司其職者乃衝任二脉起於胞中者行其化也是故五藏六府之經皆受氣於六脉因以海名之所以二脉貴乎流通而惡閉塞流通則天之陽氣下降與之從事故施化之道行閉塞則天之陽絕故地之陰亦結而百病作矣疝者是其二也所致任脉之病者若剛柔自相勝負與內外邪之感傷皆得使其陰陽不和陰偏勝則寒氣衝擊陽偏勝則熱氣內入陰反之外悉致任脉為疝縱其邪不自任脉

而起初由各經所受而得者亦必與任脉相犯故也所犯者何或所勝之經脉相傳或受不以次所乘或任脉過處與受邪之經相會或六經受氣之際挾邪犯其海則皆足以感動任脉內舍結固不化之陰上擊藏府則為腹中之疝下入厥陰會於陰器則為辜丸之疝蓋疝自立名獨為任脉所職在地之陰特然起擊者而命之也若諸經受邪不與任脉相干則不名為疝矣不然何內經舉痛篇靈樞百病始生篇專為發

明經脉腹中諸痛者乃無一字名其疝也始可見任脉者是疝病之本源諸經所云疝者是其支流餘裔耳若夫巢氏所敘七疝者曰厥疝癥疝寒疝氣疝盤疝肘疝狼疝也其厥逆心痛諸飲食吐不下名曰厥疝腹中氣乍滿心下盡痛氣積如臂名曰癥疝寒飲食即脇下腹中盡痛名曰寒疝腹中乍滿乍減而痛名曰氣疝腹中痛在臍旁名曰盤疝腹中臍下有積聚名曰肘疝小腹與陰相引而痛大便難名曰狼疝及言

諸疝之候止以陰氣積於內為寒氣所加使榮衛不調血氣虛弱故風冷入於腹內而成疝也小兒瘖者陰核腫大由啼哭軀氣不止動於陰氣結聚不散所致者也觀於五疝皆是痛在心腹之疝也獨舉瘖疝屬小兒病者耳後人述其說更舉內經謂脾風傳之於腎名曰蠱疝瘕少腹寬而痛一名曰蠱者謂之蠱病又立陰疝條即癩疝也將以足七疝之數此言五條為心腹痛者之治療則曰若因七情所傷者當調氣安

其五藏外邪所干者當溫散之治之不當內外
之氣交入於腎者為腎氣入於膀胱者為膀胱
氣入於小腸者為小腸氣腎與膀胱一藏一府
其氣通於外腎小腸系於睪丸系會故也又謂
陰疝一名癰疝其種有四積腸癰氣癰卵脹水
癰是也若寒溫之氣有連於小腸者即小腹控
睪丸而痛陰丸上下謂之腸癰寒氣客於經筋
足厥陰脉受邪脉脹不通邪結於睪卵謂之卵
脹腎虛之人因飲食不節喜怒不時津液內結

謂之水癰至張戴人非之曰此俗工所立謬名
也蓋環陰器上抵少腹乃屬足厥陰肝經之部
分是受疝之處也或在泉寒勝水氣攣縮鬱於
此經或司夫燥勝木氣抑鬱於此經或忿怒悲
哀憂抑頓挫結於此經或藥淋外固閉尾縮精
壅於此經了不相干膀胱腎小腸之事乃厥陰
肝經之職也凡疝者非肝木受邪則肝木自甚
也由是於陰疝中亦立七疝之名曰寒疝水疝
筋疝血疝氣疝狐疝癰疝也寒疝其狀囊冷結

硬如石陰莖不舉或連控辜丸而痛得於坐卧
濕地及磚石或冬月涉水或值雨雪或風冷處
使內過勞宜以溫劑下之久而無子水疝其狀
腎囊腫痛陰汗時出或囊腫狀如水晶或囊痒
搔出黃水或小腹按之作水聲得之飲水醉酒
使內過勞汗出而遇風寒濕之氣聚於囊中故
水多令人為卒疝宜以逐水之劑下之筋疝其
狀陰莖腫脹或潰或膿或痛而裏急筋縮或莖
中痛痛極則痒或挺縱不收或白物如精隨洩

而下得於房室勞傷及邪術所使宜以降心火
之藥下之血疝其狀如黃瓜在小腹兩傍橫骨
兩端約中俗云便癰得於春夏重感大燠勞於
使內氣血流溢滲入脬囊留而不去結成癰腫
膿少血多宜以和血之劑下之氣疝其狀上連
腎區下及陰囊或因號哭忿怒則氣鬱之而脹
怒哭號罷則氣散者是也宜以散氣之劑下之
或小兒亦有此疾俗曰偏氣得於父已年老或
年少多病陰痿精怯強力入房因而有子胎中

病也此病不治狐疝其狀如瓦卧則入小腹行
立則出小腹入囊中狐則晝出穴而溺夜入穴
而不溺此疝出入上下往來正與狐相類亦與
氣疝大同小異令人帶鈞鈴是也宜以逐氣流
經之藥下之癩疝其狀陰囊腫絕如升如斗不
痒不痛是也得之地氣卑濕所生故江淮之間
湫塘之處多感此疾宜以去濕之藥下之諸疝
下去之後可調則調可補則補各量病勢勿拘
俗法經所謂陰盛而腹脹不通者癩瘰疝也不

可不下其論如此戴人既曰用內經靈樞明堂
之論要窮疝病之源而不及於任脉生病之源
何也蓋因力辨陰器與小腸腎膀胱了不相干
是屬足厥陰部分受病之原立說所以不及於
任脉然已三見於論中矣其間引治疝之穴多
與任脉所會一也又稱衝任督與厥陰會於曲
骨環陰器一也復言凡精滑白淫皆男子之疝
也血涸不月罷腰膝上熱嗑乾少腹有塊女子
之疝也但女子不謂之疝而謂之瘕即任脉內

結之病尤明者二也凡戴人辯論之詞強直專
主其一則不復顧其二在癩疔中有無六經外
證之可辨若果有膀胱小腸之證者又安得不
從之如靈樞謂小腸病者小腹痛腰脊控𦉳先
而痛之類論治法亦然因病在下必先下之更
不問虛弱之人於首尾不可下者下之有不旋
踵之禍豈待下後始補而可回其生乎然而戴
人之書其詞直其義明讀之使人豁然以去胸
中之茅塞誠是諸醫書之冠及乎詳玩之則少

溫潤反覆之意且夫陰陽變化生病於無窮治
法亦無窮非一人所能究學者當因其已明益
其未至然後得爲善用其書者丹溪先生嘗論
𦉳丸連小腹急痛者或有形或無形或有聲或
無聲人皆以爲經絡得寒收引不行而作痛不
知此病始於濕熱鬱遏至久又感外寒濕熱被
鬱而作痛也其初致濕熱之故蓋大勞則火起
於筋醉飽則火起於胃房勞則火起於腎大怒
則火起於肝火鬱之久濕氣便盛濁液凝聚并

入血隧流於厥陰肝屬木性急速火性又暴烈
為寒所束宜其痛甚而暴也此論亦就厥陰受
病處發明戴人之未至者也誠有功於後學蓋
癰疽不離此二者之邪熱則縱寒則痛濕則腫
須分二者多少而治之兩丸俱病固然也設有
偏於二者者予又不能無其說焉腎有兩分左右
其左腎屬水水生肝木木生心火三部皆司血
統納左之血者肝木之職也其右屬火火生脾
土土生肺金三部皆司氣統納右之氣者肺金

之職也是故諸寒收引則血泣所以寒血從而
歸肝下注於左丸諸氣憤鬱則濕聚所以氣濕
從而歸肺下注於右丸且夫單丸所絡之筋非
盡由厥陰而太陰陽明之筋亦入絡也往往見
人偏患於左丸者則痛多腫少偏於右丸者則
痛少腫多此便可驗也姑書治效者一二症以
明之予壯年啖柑橘過多積成飲癖在右脇下
隱隱然不敢復啖數年已一日山行大勞饑渴
甚遇橘芋食之橘動舊積芋復滯氣即時右丸

腫大寒熱交作因而思之脾肺皆主右故積飲
滯氣下陷太陰陽明之經筋俱傷其邪從而入
於囊中著在睪丸筋膜而為腫脹張戴人有言
病分上下治雖是木鬱為疝在下則不可吐亦
當從下引而竭之竊念病有不同治可同乎今
犯饑勞傷脾脾氣下陷必升舉之則胃氣不復
下陷而積可行若用藥下之恐重陷胃氣也先
服調胃劑一二貼次早注神使氣至下焦嘔逆
而上覺肋下積動到中焦則吐而出之吐後癩

腫減半次早復吐吐後和胃氣疎通經絡二三
日愈凡用此法治酒傷與飲水注右丸腫者皆
効又治一人病後飲水患左丸痛甚灸太敦用
摩腰膏內用烏附丁麝者以摩其囊上抵橫骨
端灸溫帛覆之痛即止一宿腫亦全消矣
歷代獨治外束之寒發明云男子七疝痛不
可忍者婦人瘕聚帶下皆任脉所主陰經也乃
肝腎受病治法同歸於一宜丁香練實丸凡疝
氣帶下皆屬於風全蝎治風之聖藥也川練苗

香皆入小腸經當歸玄胡索活血止痛疝氣帶
下皆積寒邪入於小腸之間故用附子佐之丁
香木香為引導藥也 羅謙甫治火兒赤紐隣
久病疝氣復因七月間饑飽勞役過飲潼乳所
發甚如初面色青黃不澤臍腹陣痛撮不可
忍腰曲不能伸熱物熨之稍緩脉得細小而急
難經云任之為病男子內結七疝皆積寒於小
腸之間所致也非大熱之劑即不能愈遂製一
方名之曰沉香桂附丸 臍下撮急疼痛并臍

下周身一遭皆急痛小便頻數清其五脉急洪
緩潛沉按之皆虛獨腎脉按之不急皆虛無力
名曰腎疝宜丁香疝氣丸 男子婦女疝氣臍
下冷痛相引腰膝而痛宜當歸四逆湯 發明
天台烏藥散川苦練散簡易木香練子散皆用
巴豆炒藥許學士云大抵此疾因虛而得之不
可以虛驟補邪之所乘其氣必虛留而不去其
病則實故必先滌去所蓄之邪熱然後補之是
以諸藥多借巴豆氣者蓋為此也 金匱方寒

疝腹中痛逆冷手足不仁若身疼痛灸刺諸藥不能治抵當烏頭桂枝湯主之用烏頭一味以蜜二升煎減半去渣以桂枝湯五合和之令得一升後初服二合不知再服三合又不知復加至五合其知者如醉狀得吐者為中病海藏以附子建中湯加蜜煎治疝即此法也腹痛脉弦而緊弦則衛氣不行即惡寒緊則不欲食弦緊相搏即為寒疝寒疝繞臍痛若發則自汗出手足厥冷其脉沉弦者大烏頭煎主之 衍義

云葫蘆巴本經云得茴香桃仁治膀胱氣甚効嘗合用桃仁麩炒各等分半酒糊丸半為散每服五七十九丸空心食前鹽酒下散以熱米飲調下與丸子相間空心各一二服効 寶鑑葫蘆巴丸

丹溪治內鬱之濕熱煎方枳實九粒桃仁十個山梔仁九個吳茱萸七粒山查四粒生薑如指大右六味同入搗盆搗細取順流水一鍾入瓶內煎至微沸帶查服如濕勝癩疝者加荔枝核

七 連通 寶鑑

如痛甚者加鹽炒大茴香二錢如痛處可按者
加薄桂少許丸方山梔二兩山查四兩枳實炒
炒茴香二兩柴胡牡丹皮八角茴香各一兩桃仁兩
茱萸炒各半兩末之酒糊丸空心鹽湯下五六十九
陽明受濕熱傳入太陽發熱惡寒小腹連毛
際間悶痛不可忍用梔子仁炒桃仁炒枳實炒
山查各等分同研細入生薑汁半合用水一小鍾
盪起煎令沸熱服之一方加茱萸
寒熱兼施 靈樞云胃中熱腸中寒則疾饑小

腹痛脹 丹溪云愚見有用川烏頭梔子等分
作湯用之其効亦敏後因此方隨症與形加減
用之無有不効蓋川烏頭治外束之寒梔子仁
治內鬱之熱也 又云諸疝痛處用手按之不
痛者屬虛必用桂枝炒山梔細切川烏頭等分
為細末生薑自然汁打糊為丸如桐子大每服
三四十丸空腹白湯下 羅謙甫云陰疝足厥
陰之脉環陰器抵少腹或痛因腎虛寒水涸竭
瀉邪補肝葵藜湯主之

五
五
五

補例 丹溪云疝有挾虛而發者其脉不甚沉
緊而大豁無力者是也然其痛亦輕唯覺重墜
牽引耳當以參朮為君疏導藥佐之蓋疏導藥
卽桃仁山查枳實梔仁茺蔚川練玄胡索丁香
木香之類是也 海藏云姬提領因疾服涼劑
數日遂病臍腹下大痛幾至於死與薑附等劑
雖稍蘇痛不已隨本方內倍芍藥服之愈 金
匱方寒疝腹中痛及脇痛裏急者當歸生薑羊
肉湯主之衍義云張仲景治寒疝用生薑羊肉

湯服之無不應驗有一婦人產當寒月寒氣入
產門腹臍以下脹滿手不欲犯此寒疝也師將
治之以抵當湯謂有瘀血非其治也可服仲景
羊肉湯二服遂愈

肝氣 肝足厥陰經之病必小腹引脇而痛經
云厥陰之復小腹堅滿裏急暴痛是風氣助肝
盛而然治法當瀉肝也又云歲金太過民病兩
脇下痛小腹脹又云歲木不及燥乃大行民病
中清肢脇痛少腹痛又云歲土不及風乃大行

民病腹痛復則胸脇暴痛下引小腹者是燥邪
攻肝虛而然治法當補肝瀉金也又云寒氣客
於厥陰之脉則血泣脉急故脇肋與小腹相引
痛又云肝病者兩脇下痛引小腹取其經厥陰
小腸又云邪客厥陰之絡令人卒疝暴痛刺足
大指爪甲上與肉交者各一疝男子立已女子
有頃已左取右右取左瀉肝山梔川芎桂芍
之屬補肝當歸生薑羊肉之屬
小腸氣 小腸之病小腹引睪丸必連腰脊而

痛經云少陰之脉心下熱善饑臍下痛又云少
陰之復燠熱內作小腹絞痛者是熱助小腸盛
而然治法當瀉小腸也又太陽在泉寒淫所勝
與太陽之復皆病小腹控睪引腰脊上衝心痛
及太陰司天大寒且至病小腹痛者是寒邪攻
小腸虛而然治法當補小腸瀉寒邪也 實鑑
引至真大要論云小腹控睪引腰脊上衝心唾
出清水及為噦噫甚則入心善悲善忘甲乙經
曰邪在小腸也小腸病者小腹痛引腰脊貫肝

肺其經虛不足則風冷乘間而入邪氣既入則厥之證上衝肝肺客冷散於胸結於臍控引羸丸上而不下痛而入腹甚則衝心胸蓋其經絡所屬所係也治之方茴香炒練實炒食茱萸陳皮馬蘭花醋炒各一兩羌花醋炒五錢右為末醋糊丸如桐子大每服十丸至二十丸溫酒送下又方益智仁蓬朮各半兩茴香山茱萸肉牛膝續斷川芎葫蘆巴防風牽牛炒熟甘草各二錢半為細末每服三錢水一盞二分煎兩三沸空心連滓

服白湯調下二錢七亦得

膀胱氣 膀胱之病小腹痛腫不得小便是也經云太陰在泉病小腹痛腫不得小便是濕邪攻膀胱虛而然治法當補膀胱瀉濕土邪也又云膀胱病者小腹偏腫而痛以手按之即欲小便而不得取委中央又云小腹痛腫不得小便邪在三陽取之足太陽大絡即委陽穴許學士云頃在岳城日欽尉宋荀甫膀胱氣作疼不可忍醫者以剛劑與之痛愈甚小便不通三日矣臍

下虛脹心悶予因候之見其面赤黑脉洪大予
日投熱藥太過陰陽痞塞氣不得通為之奈何
宋尚手持四神丹數粒云醫謂不止更服此予
日若服此定斃後無悔渠求治予適有五苓散
一兩許分三服用連鬚葱一莖茴香一撮鹽一
錢水一盞半煎至七分令接續三服中夜下小
便如墨汁者一二升腰下竟得睡翌日診之脉
已平安矣續用礪砂丸與之數日瘥小婁全善
治謝人妻小腹疼痛小便不通先灸灸二陰交

以茴香丁香青皮檳榔桂茱萸玄胡索山查枳
實又倍用黃蘗煎服愈

心疝 心脉微滑為心疝 心脉搏滑急為心
疝 帝曰診得心脉而急此為何病岐伯曰病
名心疝小腹當有形也心為牡藏小腸為之使
故曰少腹當有形也 木香散 廣藏煮散

癩疝

畢囊腫大如升如斗是也 丹溪云下
部癩氣不痛之方細思非痛斷房事與厚味不
可用藥唯促其壽若蒼朮神麴白芷山查川芎

枳實半夏皆要藥人視其藥皆鄙賤之物已啓
慢心又不能斷欲以愛護其根本非惟無益而
反被其害者多矣且其藥宜隨時月寒熱更按
君臣佐使加減大抵癩疔屬濕多 蒼朮神麴
白芷散山查川芎枳實半夏南星有熱加山梔
一兩堅硬加朴硝半兩秋冬加吳茱萸二錢半
神麴糊丸 又方南星山查蒼朮各二兩白芷
半夏枳實神麴各一兩海藻昆布各半兩玄明
粉吳茱萸各二錢為末酒糊丸 又方治木腎

不痛南星半夏黃蘗酒洗蒼朮鹽炒枳實山查白芷
神麴炒滑石炒茱萸昆布酒糊丸空心鹽湯下
治癩脹用香附子不拘多少為末每用酒一
盞海藻一錢煎至半盞先撈海藻細嚼用所煎
酒調末二錢服 楮葉雄者曬乾為末酒糊丸
空心鹽酒下無實者為雄 潔古海蛤丸 癩氣痛
者易治荔枝散二層茴香丸宣胞丸地黃膏子
丸安息香丸念珠丸隨宜選用 陰囊腫脹大
小便不通宜三白散 偏墜初生用穿山甲茴

香二味爲末酒調下乾物壓之外用牡蠣煨良
薑各等分爲細末津唾調敷大者一邊須更如
火熱痛卽安 丹溪治一人因飲酒後飲水與
水果偏腎大時作蛙聲或作痛炒枳實一兩茵
香鹽炒梔子炒各三錢研煎下保和丸 一人
膀胱氣下墜如蛙聲臭橘子核炒十枚桃仁二
十枚蘿蔔自然汁研下保和丸 一人左腎核
腫痛此飲食中濕墜下成熟以橘核五枚桃仁
七枚細研順流水一盞煎沸熱下保和丸 大

腎以枇杷葉野紫蘇葉蒼耳葉水晶葡萄葉濃
煎湯熏洗 雄黃一兩研礬二兩生甘草半兩
水五升煎洗 荆芥穗一兩朴硝二兩爲麤末
蘿蔔葱同煎湯淋洗 大黃末醋和塗之乾卽
易 馬鞭草搗塗 蔓菁根搗傅 經云陽明
司天燥淫所勝丈夫癩疔婦人小腹痛又云陽
明之勝外發癩疔是燥邪攻肝氣虛而然治法
當補肝瀉燥金也 又云厥陰所謂癩疔婦人
少腹腫者厥陰者辰也三月陽中之陰邪在中

故曰癰疽少腹腫也所謂癰疽膚脹者曰陰亦
盛而脈脹不通故曰癰癢疽也 三陽為病發
寒熱下為癰腫及為痿厥肺瘡其傳為癰疽
東垣曰陰陽別論云三陽為病發寒熱下為癰
腫及為痿厥肺瘡其傳為索澤又傳為癰疽夫
熱在外寒在內則累垂此九夏之氣也寒在外
熱在內則卵縮此三冬之氣也足太陽膀胱之
脈逆上迎手太陽小腸之脈下行至足厥陰肝
之脈不得伸其任脈並厥陰之脈逆則如巨川

之水致陽氣下墜是風寒濕熱下出囊中致兩
辜腫大謂之曰疝太甚則為癰足厥陰之脈與
太陽膀胱寒水之脈同至前陰之末傷寒家說
足厥陰肝經為病煩滿囊縮急下之宜大承氣
湯以瀉太熱靈樞經云足厥陰肝經筋中為寒
則筋攣卵縮為大寒前說囊縮為太熱此說為
大寒此說囊縮垂辜下引癰疽脚氣為大寒風
濕盛下垂為寒與上二說不同何也曰以平康
不病人論之夏暑太熱囊卵累垂冬夫大寒急

縮收上與前三說又不同何也是相乖耶不相
乖耶答曰傷寒家囊卵縮太熱在內宜承氣湯
急下之與經筋說囊卵縮太寒在外亦是熱在
內與傷寒家同故再引平康人以證之冬天陽
氣在內陰氣在外人亦應之故寒在外則皮急
皮急則囊縮夏月陰氣在內陽氣在外人亦應
之故熱在外則皮緩皮緩則囊垂此癩疝之象
也三說雖殊其理一也用藥者宜詳審之已上
三論各有所主兼此攷訂則脉證陰陽寒熱虛

實之辨判然矣 內經刺灸癩疝有四法 其
一鉞石取畢囊中水液經云腰腎者身之太關
節也肢脛者人之管以趨翔也莖垂者身中之
機陰精之候津液之道也故飲食不節喜怒不
時津液內溢乃下流於畢血道不通日久不休
俛仰不便趨翔不能此病榮然有水不上不下
鉞石所取形不可匿常不得蔽命曰去爪其法
今世人亦多能之畢丸囊大如斗者中藏穢液
必有數升信知此出古法也 其二取肝經云

足厥陰之脉是動則病丈夫癩疝婦人小腹腫
是也是於足厥陰肝經視盛虛熱寒陷下而施
補瀉留疾與灸也 其三取肝之絡經云足厥
陰之别名曰蠡溝去內踝五寸別走少陽其別
者經脛上臑結於莖其病氣逆則臑腫卒疝取
之所別是也是於內踝上五寸貼脛骨後近肉
處蠡溝取之也 其四取足陽明筋經云足陽
明之筋聚於陰器上腹其病轉筋髀前腫癢疝
腹筋急治在燔針劫刺以知為數以痛為輸是

也是於轉筋痛處用火針刺之也

狐疝

卧則入腹立則出腹偏入囊中者是也

仲景方陰狐疝氣有大小時時上下者蜘蛛

散主之 內經刺灸狐疝但取足厥陰一經經

云肝足厥陰之脉所生病者狐疝是也隨其經

盛虛寒熱陷下取之也 耳後陷者腎下腎下

則腰尻痛不可俛仰為狐疝

通治 不問何證皆可用生料五積散每服一

兩入鹽炒吳茱萸茴香各一錢生薑三片葱白

五寸煎空心熱服 服藥未効太痛攻刺不已
陰縮手足厥冷宜香附子仍炒鹽乘熱用絹裹
熨臍下若大小腑不甚通者五苓散加桂下青
木香丸 初發或頭疼身熱或憎寒壯熱並宜
參蘇飲加木香有逆上攻心下不覺痛而見心
疼者宜以生韭搗取自然汁和五苓散為丸茵
香湯下有腎氣纔動心氣亦發上下俱疼者宜
異攻散吞茱萸內消丸或且專治下下痛定則
上痛定矣 神方治疝氣上衝如有物築塞心

胸欲死手足冷者二三服除根硫黃火中鎔化
即投水中去毒研細荔枝切片炒黃陳皮各等
分右為末飯丸桐子大每服十四五丸溫酒下
其疼立止患人自覺疼甚不能支持止與六九
不可多也 食積與瘀血作痛者導積行血則
愈於傷食畜血
二門求之
寸口弦緊為寒痙弦則衛氣不行氣不行
則惡寒緊則不飲食 寸口遲緩遲為寒緩為
氣氣寒相搏轉絞而痛 沉緊豁大為虛 弦

急搏皆疝視在何部而知其藏心脉微滑為心
疝肝脉滑為癩疝腎脉滑為癩疝太急沉為腎
疝肝脉太急沉為肝疝心脉搏急為心疝肺脉
沉搏為肺疝脾脉緊為脾疝寸弦而緊弦緊
相搏為寒疝跌陽虛遲為寒疝肝脉滑甚
為癩疝腎肝滑甚為癩疝東垣曰夫滑脉關以
上見者為大熱蓋陽
與陽併也故大熱滑脉尺部見為大寒生癩疝
滑脉者命門包絡之名也為丙丙丁熱火併於
下蓋丙丁不勝壬癸從
寒水之化也故生癩疝

交腸

交腸之病大小便易位而出或因醉飽或因太
怒遂致藏氣乖亂不循常道法當宣吐以開提
其氣使闌門清利得司泌別之職則愈矣宜五
苓散調氣散各一錢加阿膠末一錢湯調服或
研黃連阿膠丸為末加木香少許再以前藥送
下丹溪治馬希聖年五十餘性嗜酒常痛飲
不醉糟粕出前竅便溺出後竅六脉皆沉澀與
四物湯加海金沙木香檳榔木通桃仁服而愈

此人酒多氣肆酒升而不降陽極虛酒濕積久
生熱煎熬血乾陰亦大虛陰陽偏虛皆可補接
此人中年後陰陽俱虛時暫可活者以其形實
酒中穀氣尚在三月後其人必死後果然

交關之脈大小與長宮而出返因積留如因大
交關

腸鳴

內經腸鳴有五 一曰脾虛經云脾虛則腹滿
腸鳴餐泄食不化取其經太陰陽明少陰血者
是也 二曰中氣不足經云中氣不足腸為之
苦鳴補足外踝下留之五分申脉穴也 三曰
邪在大腸經云腸中雷鳴氣上衝胸邪在大腸
刺育之原巨虛上廉三里是也 四曰土鬱經
云土鬱之發腸鳴而為數後是也 五曰熱勝
經云少陰在泉熱淫所勝病腹中腸鳴氣上衝

胸治以鹹寒是也 東垣云如胃寒泄瀉腸鳴
於升陽除濕湯加益智仁五分半夏五分生薑
棗子和煎 丹溪云腹中水鳴乃火擊動其水
也二陳湯加苓連梔子 腹中鳴者病本於胃
也 婁全善云腸鳴多屬脾胃虛一男子腸鳴
食少臍下有塊耕動若得下氣多乃已已則復
鳴醫用疎氣藥與服半年不効予用參朮為君
甘草連苓枳乾薑為臣一貼腸鳴止食進又每
服吞厚朴紅豆丸其氣耕亦平經云脾胃虛則
腸鳴腹滿又云中氣不足腸為之苦鳴此之謂
也 肺移寒於腎為涌水涌水者按之腹不堅
水氣客於大腸疾行則鳴濯濯如囊裹水漿之
聲也河間葶藶丸主之

難經云病之虛實出者為虛入者為實肛門之
 脫非虛而何哉蓋實則溫溫則內氣充而有所
 蓄虛則寒寒則內氣餒而不能收況大腸有厚
 薄與肺為表裏肺藏蘊熱則閉虛則脫本草有
 云補可以去弱澀可以去脫若脫甚者既補之
 必兼澀之設不澀於內亦須澀於外古方用五
 倍子末托而上之一次未收至五七次必收而
 不復脫矣久利婦人小兒老人有此疾者產育

脫肛

難經云病之虛實出者為虛入者為實肛門之
 脫非虛而何哉蓋實則溫溫則內氣充而有所
 蓄虛則寒寒則內氣餒而不能收況大腸有厚
 薄與肺為表裏肺藏蘊熱則閉虛則脫本草有
 云補可以去弱澀可以去脫若脫甚者既補之
 必兼澀之設不澀於內亦須澀於外古方用五
 倍子末托而上之一次未收至五七次必收而
 不復脫矣久利婦人小兒老人有此疾者產育

及久痢用力過多小兒氣血未壯老人氣血已衰故肛易於出不得約束禁固也肛門爲大腸之候大腸受熱受寒皆能脫出當審其因證寒者以香附子荆芥等分煎湯洗之熱者以五倍子朴硝煎湯洗之亦用木賊燒灰不令煙盡入麝香少許大便了貼少許或以五倍子末攤紙上貼肛緩緩揉入有腸頭作痒卽腹中有蟲丈夫因酒色過度大腸者傳導之官腎者作強之官益腎虛而洩母氣肺因以虛大腸氣無所主

故自脫肛治法實元氣去蘊熱之劑外用煎藥洗之醫治無不愈矣 大腸熱甚與腸風者涼血清腸散 瀉痢後大腸氣虛肛門脫出不腫不痛屬氣血虛宜補氣血爲主赤腫有痛宜涼血祛風爲主補氣血八珍湯十全散涼血生芩赤芍槐花槐角黃芩萸雞冠花疎風防風羌活荆芥 久瀉痢者補養脾胃宜參朮實脾湯用力過多者十全大補湯參朮芩歸湯訶子人參湯內加升提藥 大腸虛而挾熱脫肛紅腫

宜縮砂湯槐花散薄荷散 大腸虛而挾寒脫
肛不紅腫宜蝟皮散香荆散 日久不愈常宜
服收腸養血和氣湯 澀脫龍骨散澀腸散
外治陽證蟠龍散 陰證伏龍肝散 五倍子
末煎湯加白礬洗 五倍荆芥小便濃煎洗
荆芥龍腦薄荷朴硝煎湯洗 皂角搥碎煎湯
浸 生括萹搗汁浸 葱湯洗軟芭蕉葉托上
生鐵三斤水一斗煮取五升出鐵以汁洗內
服磁石散 龍頭燒灰塗

穀道痒痛

穀道痒多因濕熱生蟲欲成痔瘻宜以雄黃入
艾綿燒煙熏之并納蜣螂丸 蜣螂丸治肛門
痒或出膿血有蟲傍生孔竅內用蜣螂七枚五
月五日收去翅足灸為末新牛糞半兩肥羊肉
一兩炒令香右共如膏丸如蓮子大灸令熱以
新綿薄裹納下部中半日少喫飯即大便中蟲
出三五度永瘥 治穀道腫赤腫或痒或痛用
杏仁搗作膏傅之或炒令黃以綿蘸塗穀道中

外臺治下部蟲齧杵桃葉一斛蒸之令極熱
內小口器中以下部榻上坐蟲立死治肛門
腫痛用木鼈子去殼取肉四五枚研如泥安新
瓦器或木盆以沸湯衝動洗了另用少許塗患
處

診 鬻蝕陰脫其脉虛小者生緊急者死

痔

巢氏病源有五痔之論云肛邊生鼠乳出在外
時時出膿血者牡痔也肛邊腫生瘡而出血者
牝痔也肛邊生瘡痒而復痛出血者脉痔也肛
邊腫核痛發寒熱而血出者腸痔也因便而清
血隨出者血痔也又有酒痔肛邊生瘡亦有血
出又有氣痔大便難而血出肛亦出外良久不
肯入諸痔皆由傷風房室不慎醉飽合陰陽致
勞損血氣而經脉流溢滲漏腸間衝發下部久

痔

集韻

集韻

不瘥變為瘻也聖濟總錄敘痔之形狀謂由五
府之所傳大腸之所受可謂得其始末矣若內
經所謂因而飽食筋脉橫解腸澀為痔又謂少
陰之復為痔註又以小腸有熱則戶外為痔又
謂督脉生病癢痔蓋督脉自會陰合纂間繞纂
後別繞腎是督脉者與衝任本一脉初與陽明
合筋會於陰器故屬於腎而為作強者也由是
或因醉飽入房精氣脫舍其脉空虚酒毒之熱
乘之流着是脉或因淫極而強忍精不泄或以

藥固其精停積於脉流注纂間從其所過大腸
肛門之分以作痔也與靈樞所謂膀胱足太陽
之脉及筋皆抵腰中入絡腎其支者貫腎故主
筋生病者為痔亦與督脉病痔之理同也自此
推之足厥陰之筋脉環前後二陰寧不為痔乎
每見患鼠痔者其發則色青痛甚豈非因肝苦
急苦痛甚故本色見耶方論有謂五痔潰皆血
膿者獨為熱甚血腐者言也至若潰出黃水者
則為濕熱矣更宜於東垣方論求之 東垣治

濕熱風燥四氣。內經曰：因而飽食，筋脉橫解，腸澀爲痔。夫大腸庚也，主津，本性燥清肅殺之氣，本位主收，其所司行津液以從足陽明中州戊土之化。若旺則能生化萬物而衰亦能殞殺萬物，故曰萬物生於土而歸於土也。然手足之陽明同司其化焉。既在西方，本位爲之，害蜚司殺之府，因飽食行房，忍泄前陰之氣歸於大腸，以致木乘火勢而侮燥金，以火就燥則大便閉而痔漏作矣。其疾甚者當以苦寒瀉火，以辛溫

和血潤燥，疎風止痛，是其治也。以秦艽當歸稍和血潤燥，以桃仁潤血，以皂角仁除風燥，以地榆破血止血，以枳實之苦寒補腎，以下泄胃實，以澤瀉之淡滲使氣歸於前陰，以補清燥受胃之濕邪也。白朮之苦甘以苦補燥氣之不足，其甘味以瀉火而益元氣也。故曰甘寒瀉火，乃假枳實之寒也。古人用藥爲下焦如瀆，又曰在下者引而竭之，多爲大便秘澀，以_テ大黃推去之，其津血益不足以當歸和血及油潤之劑，大便自

然與利矣宜作剉湯以與之是下焦有熱以急
治之之法也以地榆惡入而壞胃故宿食消盡
空心作丸服之曰秦艽白朮丸 又云痔瘡若
破謂之痔漏大便秘澀必作大痛此由風熱乘
食飽不通氣逼大腸而作也受病者燥氣也為
病者胃熱也胃刑大腸則化燥火以乘燥熱之
實勝風附熱而來是濕熱風燥四氣相合故大
腸頭成塊者濕也作大痛者風也大便秘結者
主病兼受火邪熱也當去此四者其西方肺主

諸氣其體收下亦助病為邪須當以破氣藥兼
之治法全矣不可作丸以剉湯與之效如神速
秦艽蒼朮湯主之 痔漏經年因而飽食筋脉
橫解腸澀為痔治法當補北方瀉中央宜紅花
桃仁湯 痔漏大便結燥疼痛秦艽當歸湯
痔漏大便硬努出大腸頭下血苦痛不能忍當
歸郁李仁湯 痔漏成塊下垂不任其痒秦艽
羌活湯 脉訣云積氣生於脾藏傍大腸疼痛
痺難當漸交稍瀉三焦火莫漫多方立紀綱七

痔

痔

痔

小

聖丸主之。痔漏每日大便時發疼痛如無疼
痛者非痔漏也。秦艽防風湯主之。丹溪專一
涼血為主。人參黃連生地涼血當歸和川芎和
槐角涼生條芩涼大枳殼寬升麻提右煎湯服
之外以澀藥蘆甘石童便煨牡蠣粉龍骨海蛤
蜜陀僧之類敷之。薛新甫云初起焮痛便秘
或小便不利者宜清熱涼血潤燥疎風若氣血
虛而寒涼傷損者調養脾胃滋補陰精若破而
久不愈多成痔漏有穿臀穿陰穿腸者宜養元

氣補陰精為主。大便秘澀或作痛者潤燥除濕
肛門下墜或作痛者瀉火除濕下墜腫痛或作
痒者祛風勝濕腫痛小便澀滯者清肝導濕若
有患痔而兼疝患疝而兼下疳皆屬肝腎不足
之變症但用地黃丸益氣湯以滋化源為善若
專服寒涼治火者無不致禍。牡痔乳香散猪
蹄灰丸。牝痔檳榔散榼藤散麝香散。酒痔
赤小豆散乾葛湯。氣痔橘皮湯威靈仙丸熏
熨方。血痔地榆散椿皮丸猪臟丸。腸痔皂

角煎丸鼈甲丸 脉痔刺蝟皮丸桑木耳散
痛甚秦艽當歸湯七聖丸能消丸地榆散試蟲
散龍腦散白聖散黑玉丹或用荔枝草煎湯入
朴硝洗之効 痒甚秦艽羌活湯外用槐白皮
濃煎汁安盆中坐重之冷即再暖良久欲大便
當蟲出或用水銀棗膏各二兩研勻捏如棗形
薄綿裹納之明日蟲出若痛者加粉草三大分
作丸或用威靈仙枳殼炒各一兩為麤末熬水
熏洗冷即再暖臨卧避風洗三次挹乾貼蒲黃

散或用艾入雄黃末燒煙熏之 下血不止芎
歸丸黑丸子臭樗皮散二礬丸苦棟丸槐角地
榆湯槐角枳殼湯外敷血竭末 氣滯發痔荆
枳湯 血瘀作痛逐瘀血湯 血痔久痔潔古
用黑地黄丸主之云治痔之聖藥也 運氣痔
發皆屬寒經云太陽之勝痔瘡發治以苦熱是
也則痔固有寒者矣本事四方用桂附方其治
乎 熏痔方用無花果葉煮水熏少時再洗
又法燒新磚以醋沃坐熏良 洗藥方治番花

痔用荆芥防風朴硝煎湯洗之次用木鼈子五
倍子研細調傅如肛門腫熱再以朴硝末水調
淋之良方又方無花果葉七片五倍二錢皮硝
二錢水一碗煎八分砂鍋內乘熱熏洗敷藥
雞內金蒲黃血竭各等分爲末濕則乾摻乾則
油調傅又方茄蒂何首烏文蛤酥炙各等分
蜜薑汁雞子清攪勻調傅膏藥杏仁去皮五
錢草麻子去殼七錢乳香二錢沒藥四錢血竭
六錢片腦一錢銅綠二錢瀝青二錢松香二兩

穿山甲灰炒研末二錢人乳一酒鍾先將草麻
杏仁搗如泥次入松香搗爛次第入諸藥量入
人乳搗令軟硬得所再搗五六百下收磁器中
封固臨時以手撚如錢攤厚紙或帛上拔腐去
膿生新肉

李防禦專科治痔丸方朝貴用之屢効蓋其用
藥簡要有次第製造有法無苦楚而收効甚速
凡痔出外或番若蓮花復便血疼痛不可坐卧
甚者用下藥早上藥一次午一次晚又一次至

痔
夜看痔頭出黃水膏如泉當夜不可再上藥且
令黃水出盡次日看痔消縮一半若更上藥二
二日為好若年高人應外腎牽引疼痛可用人
以火烘熱手於大小便間熨之其痛自定黃水
未盡可再傳一日藥仍須勤用曉外科入早晚
看照黃水流至盡是病根已去也水澄膏係護
肉藥鬱金白芨二味各等分細末候痔出側臥
以鹽湯洗淨拭用新水和蜜盞內調勻却入藥
末同敷在穀道四向好肉上留痔頭在外用紙

蓋藥仍用筆蘸溫水塗紙令常潤澤却用下枯
藥好白礬四兩通明生砒二錢半重朱砂一錢
生研如粉細三味先用砒末安建盞中次用白
礬末蓋之用火煨令煙斷其砒盡從煙去止是
借砒氣在白礬中將枯礬取出為細末先看痔
頭大小多寡將礬末抄上掌中加朱砂少許二
味以津唾調勻得所用篋子調塗痔頭上周遭
令徧日二三上須仔細詳看痔頭顏色欲其轉焦
黑乃取落之漸至夜自有黃水膏出以多為好

方是惡毒水切勿他疑中夜再上藥一次來日
依舊上三次有小疼不妨如換藥用新瓦器盛
新水或溫水在痔邊以筆輕手刷洗舊藥却上
新藥仍用前護藥老弱人用藥要全無疼痛只
增加朱砂末於礬末內自然力慢不可住藥但
可少徧數直候痔頭焦枯方可住也次用荆芥
湯洗以荆芥煎湯入瓦器時洗之潤腸丸用大
黃煨淨製枳殼當歸各等分蜜丸每服二三
丸白湯下以防肛門急燥欲大便出無澀痛而

已又龍石散用龍骨煨出火毒軟石膏煨出火
毒白芷黃丹作末摻瘡口又導赤散用生地黄
木通黃芩等分煎以防小便赤澀又雙金散用
黃連鬱金等分爲末用蜜水調敷痔頭有小痛
卽敷之若得腦子末傅尤佳又痔頭收斂卽可
服十宣散以生氣血又國老湯生甘草治痔本
藥也煎水熏洗生肌解石毒瘡極痒亦主之共
九方

周先生枯痔法明礬赤石脂五錢辰砂一錢黃丹

右為末先用鬱金末護肛門如無鬱金用薑黃末代之調塗四圍好肉如不就加菴荳粉打合却將枯藥傅上如肛門疼急濃煎甘草湯放溫拂四圍肛門上就與寬腸藥槐花大黃枳殼木通連翹瞿麥當歸右半酒半水煎 枯藥早晨上一次日午一次洗去舊藥申時又洗去又上一次如要急安至夜半子時又洗上一次至次日且看痔頭淡淡黑色兩三日如烏梅四五日內用竹篦子輕輕敲打痔頭見如石堅至七八

日便住更不須上枯藥且待自然如蘿蔔根乃脫去也洗用甘草荆芥槐花洗去舊藥方上新藥 凡醫痔之法且如明白要下手今日先與此藥所以寬大腸使大便軟滑不與痔相礙且不泄瀉痔頭未脫落者須要日日與之以大黃一兩煨枳殼炒當歸酒洗一兩同為細末丸如桐子大好酒吞下 治枯痔頭慮生他症凡用枯藥或觸壞腎根或水道赤澹痛與此方大黃木通生地各一兩滑石瞿麥各半兩同為細末

痔
每用四錢煎服。催痔方如枯盡未脫落以此
催之好磁石一錢白殭蠶生川烏五分同為細
末冷水調傅上立脫。凡用枯藥去盡乳頭恐
留痔硬頭損破肛門四圍成瘡用此藥龍骨一
錢石膏一錢沒藥五分膩粉五分同研十分細
先以荆芥湯洗次摻之切忌毒物生薑。痔脫
後用甘草湯豆豉湯洗再用荆芥五倍子煎水
洗便不生膿。治痔脫後肉痒方用大粉草濃
煎湯洗。收腸方凡用枯藥脫下乳頭隨即與

此以收其腸此方補氣又收膿去血生肉令痕
壯人參當歸各一兩川芎甘草白芷防風厚朴
桔梗桂枝黃芪右細末半酒半水煎如惡酒者
酒少水多煎之夏月減桂朴加芩檉
治痔切勿用生砒毒氣入腹反至奄忽忌喫生
冷硬物冷菜之類及酒濕麪五辣辛熱大料物
及乾薑之類化之無效

灸法大蒜十片頭垢捏成餅子先安頭垢餅於
痔頭上外安蒜片以艾灸之。唐峽州王文顯

充西路安撫司判官乘驟入駱谷有痔疾因此
大作其狀如胡瓜貫於腸頭熱如澹灰火至驛
僵仆主驛吏云此病予曾患來須灸卽瘥用柳
枝濃煎湯先洗痔便以艾炷其上連灸三五壯
忽覺一道熱氣入腸中因轉瀉鮮血穢物一時
出至痛楚瀉後遂失胡瓜所在登驟馳去 秘
傳痔漏隔礬灸法皂礬一斤用新瓦一片兩頭
用泥作一壩先用香油刷瓦上焙乾却以皂礬
置瓦上煨枯去砂爲末穿山甲一錢入紫罐內

煨存性爲末木鼈子亦如前法煨過取末一錢
五分乳香沒藥各一錢五分另研右件和勻冷
水調量瘡大小作餅子貼瘡上用艾炷灸二十四
壯灸畢就用熏洗藥先熏後洗日六度三五日
後如前法再灸以瘥爲度 熏洗方皂礬如前
製過約手規二把知母末一兩貝母末一兩葱
七莖先用水同葱煎三四沸傾入瓶內再入煎
藥令患者坐瓶口上熏之待水溫傾一半洗患
處留一半俟再灸復熱熏洗以瘥爲度

公使孫坐臥口土... 準繩六... 百五十一... 證治準繩第六終... 亦收... 證治準繩第六終...

證治準繩第六終

